

初寮集八卷

宋王安中撰

清乾隆翰林院抄本

二册

本部书开始

书 号 5874

本片卷含

初窳集

王安中



初寮集原序



一代文章必有宗惟名世者得其傳天生斯人固已不
數向非君師作而成之則其道不墜者幾希若稽本朝
太祖以神武基王業文治興斯文一傳為太宗翰林王
公元之出焉再傳為真宗楊文公大年出焉長養尊用
風示學者雖間以剛直被排斥而眷顧終不少衰至于
仁宗英宗神宗然後異才充滿中外其傑出如歐陽文
忠公又逢時得政同心德於三朝閱八年之久相與化

成天下功不少矣故其門人高第尤多惟東坡蘇公崛起西蜀嘉祐以異科治平欲躡真翰苑熙寧首待以國士及遇哲宗遂光顯于朝中間小人敲撼挫握欲殺不果者天意也上賜也晚守中山尚書左丞王公世家是邦博學工文詞年十六即貢京師後二年坡至奇之公亦自謂得師也明年坡南遷不能卒業公尋登第闢初寮精舍日夜讀書著文年二十有七游五臺為竹林泉賦以將相喻泉石格高而意新送某曾大父詩云不
論與汝小一月政自客君數百人專用吾宗公瑾伯仁
事致推尊年德之意精切渾成不類少作時方諱言蘇
學而公已潛啟其秘鑰久之徽宗旁求文士召真館閣
給札親試驟掌書命由中司入北門歷二轄其制誥表
章詩文大率雅重溫潤而時發秀傑之語定功繼伐等
碑睿謨曲宴百韻詩多出特命上恩與天通矣萬目睽
睽徒謂其鶴鳴九臯而不知奪胎換骨自有仙手故未
嘗以曲學指之今前集四十卷是也洎中興南渡四海

名勝遷謫避地萃于湖廣而公壻趙竒子辟章又家之游夏大篇短章更唱迭和即已盡發平昔之蘊所且復躬閱事物之變益以江山之助心與境會意隨辭達韻遇險而反夷事積故而逾新他人瞠乎其後我乃綽有餘裕至如桂柳佛寺諸記闕深辯麗近坡暮年之作黃張晁秦既沒系文統接墜緒誰出公右豈止襲其裳佩其環而已今後集十卷是也初公與先大父同為元符庚辰進士政和中公典貢舉擢先公第二故公季子承

議郎辟綱及公孫刑部侍郎程曾孫今邕守宗孟繼以集序為請久負諾責夫豈無說蓋公內制十八卷外制八卷李文敏公漢老實題其首且謂公天才英邁筆力有餘於文於詩皆瓌竒高妙無所不能用是序公全書所謂一言以蔽之者某尚何所伸其喙若夫本天人之相因考源流之所自以申叙累世之契好而告諸來者則不敢辭也公諱安中字履道享年若干後學尊之曰初寮先生故以名集慶元六年二月日周必大撰

徽宗皇帝在位歲久文士詩人一時輩出不減元和長慶間人物如參政翟公待制韓公翰林汪公初寮先生王公皆以文辭自顯號為傑出不可及者餘未易殫數也初寮蓋文健而深詩麗而雅至於制詔渾厚足以風動四方則李公漢老以為當承平之世多褒揚粉澤之詞使傷居爾體痛在朕躬不得施於戰士勿為子孫之謀更存輔車之勢不得加於叛國嗚呼其盡之矣自往至今幾三十年諸公之墓木何止拱把讀之使人想見當時文采風流之勝劉夢得云休唱內前拱奉曲正元朝士已無多是亦足以為初寮之嘆也周紫芝撰

初寮集序略

案此序蓋初寮內外制專集也內外制今不存唯此序見於永樂大典今附載於此

本朝承五季之後揚劉之學盛于一時其裁割纂組之工極矣石介憤然以楊公破碎聖人為世巨害著論排之甚力然當時文宗鉅儒司翰墨之職者亦必循本朝故事如近世張公安道高簡粹純王公禹玉溫潤典裁元公厚之精麗穩密蘇東坡先生雄深秀偉皆制詞之傑然者譬之王良造父策驥騄而騁康莊一日千里而節以和鑿馳之蟻封亦必中度豈能彼而不能此哉初

察先生太保王公自布衣文稱天下由東觀入掖垣由
烏府登鰲禁皆天下第一選司內外制者累年其所製
體大而義嚴事覈而旨深奇而不失正雄而不為夸褒
勲勞則布帶礪丹青之信施需者則有雨露涵濡之澤
文治平則祥極乎鳳麟申戒飭則誠著乎金石嘉武節
則毅乎彪虎之威美文德則昭乎藻火之華皆極其致
蓋與本朝三數公不相上下而馳驟乎燕許常揚之域
若不以體制拘之駸駸乎漢氏矣蓋公天才英邁筆力
有餘於文於詩皆瓌奇高妙無所不能故出為世用者
如此自徽宗皇帝即位以來擅制誥之美者公一人而
已得不謂一代之奇文歟雲龕李邴撰

欽定四庫全書卷



初寮集卷一

宋 王安中 撰

頌

擬進天應頌一首 有序

臣讀大雅皇矣上帝監觀四方之篇稱帝謂文王者
三竊知聖人之德上通于天則精神允格靈眷昭答
雖不諄諄然命之而啟迪感發之意固以明告衆著
惟聖人克知上帝之心於無聲之中得其所以言於

是寤寐祇恪而稽天若故福祿茂盛基緒綿永用光
裕於無窮雖然眷西顧而與宅立厥配而省山帝之
所以寵綏文王者如是而已固未有高靈下墮白日
顯行之殊尤卓特也此者皇帝陛下恭修大報自宮
徂郊天真來臨虛闕湧起衣冠仗衛旌旗輦輅畢出
於雲際宸翰紀述既極昭回之光節名誕播具乎中
外之聽若夫于帝其訓則炳乎其不可默已謹拜手
稽首而言曰昔者大易肇判人羣憧憧陰陽并毗山
川環互蓁萊叢蔚蹄跡交貫有聖人作於是佃漁耒
耨之利施舟楫杵臼之用講裳冕辨等璽衡明信首
義軼軒系唐跨虞賡以夏妣承以商乙緝綴闡揚至
于有周而後庶事備羸劉捨攘道術澶漫降斯草創
置不足論帝用嗇于眷佑閔厥休祉孕藏儲毓以俟
有道李宗宥跌仍世多盜五季仆起若不湏臾三靈
宅心並屬於我有宋藝祖以神武勇智拱揖而立帝
祚奮張揮斥振八紘而來之圻封紆餘外薄于海德

風膏澤時節流行兵休于屯而無所庸人尸其生而無懾聖聖相授與天同仁簡刑崇寬羣黎率俾橐戰鞘劍四夷稽服士有父祖相授之學野無尺寸不毛之田道之將興萬世一運神宗皇帝以天縱之聖御物昌之會沛然遠覽濬發獨智窮妙道於决裂之後得名儒於隱約之中擺落因仍全法三代以經術造士以保伍寓兵以義理財以事建官以威信馭戎以力政弛後衆制具定垂為永久天厚聖緒世重其華皇帝陛下聖學精微深惟堯舜之道孝悌而已廼適追元豐之制作永懷昭廟之紹述睦族以厚風俗興學以明人倫仁先窮民惠及露膏禮備於萬物之富樂成以四氣之和巍巍煌煌蓋成周不足進已教神鼎成而甘露零大晟奏而靈羽至榮光出海而澄波紺澈真符韞石而圭瑞告成雲呈紛郁之五色日見戴承之二氣雙葩駢沼同穎薦壠期應紹至史不絕書是宜顧懷精純親德響道雲車風馬來止來享竊

惟上天無心惟民是視元聖體道天則弗違天人之相通久矣故西雒東岱耆老士庶連袂扣闥以巡幸封祀為請昔者章聖皇帝既膺寶命席丕平朝饗三陵伸奉先之孝肆覲東后展勅崇之典謁教父于亳社款皇祇於汾壤夫修道以錫符奉符以行事不為進越也皇帝陛下研幾象以觀妙道之原參稽羣言當既有成議矣敢因天應立節之詔輒獻頌以廣之

頌曰

太極肇分天人異位惟皇上帝陶毓萬類帝居崇高其視自民孰為司牧統和神人於赫有宋世世修德藝祖配天經綸開闢天付所覆全有四國乾行坤承民以靜一太宗睿明思醲燮伐受命既固道化孚洽章聖纂服昊天其子曠典備舉焜耀永世仁宗繼體治極無為隆寬博愛如春之熙英廟入嗣奄宅丕后慶元靈長克昌厥後巍巍神考天錫勇智學窮幾微道探本始聃晬百代駁無足議取成詩書弗約而契迺登鴻儒迺籲衆俊

法度是飭經術是訓族懷于恩官嚴其分財用內豐威
武外奮泰陵英斷駿惠不忘昭哉嗣服率由舊章皇帝
孝弟克承先烈聖學光明睿文秀發論據經術事稽熙
豐賓興賢能子惠困窮仁克天壤威懾夷戎八玉鎮邦
九金象物山川億寧動植咸若康年屢臻禮備樂作和
平之氣發於休祥澄波郊社景曜舒光苑木連理池蓮
駢芳五色映空三秀寥房嘉禾秋薦甘露宵零羽毛之
瑞金石之英在所輒聞來獻充庭班賀相踵史書不停
惟時皇帝肅舉明禋于國之南專事天神其執伊何玄
色之圭其陳伊何三代盤匱既禩太室時乘玉輅自宮
徂郊侍臣駢馭雲氣虛明舜瞳先睹樓閣重複休衛森
布湧空十丈浩無央數日升於東氛氲四開麟車鳳輦
倏忽往來衣袂粲錯冠弁崔嵬葩華葆羽擁植徘徊僕
正虎士仰望俯拜萬夫注觀不隔纖霄上心齋莊哀時
之對曰帝予臨予敢弗戒升禋慶成敷錫時福親御翰
墨次第紀錄神藻陸離天真在目肆頒節名詔旨恭肅

惟帝來格事起振古帝意明甚若相告語帝初何言著
于率上帝謂吾皇聖孝感通克底于道文考之功帝謂
吾皇制作大定鋪張闋休莫斯為盛帝謂吾皇宜考諸
禮奉符行事對越天地祖宗在天寢兆維維徃古太平
其亞商度舒德發號勒功喬嶽觀風納賈展采汾亳帝
謂吾皇勿抑勿遲九叙既歌萬物由儀神祇祖考有待
茲時皇帝曰嘻羣臣是浴羣臣稽首天且弗違天真之
臨以啟上心曠日未議申命于今鶴來觀闕竹實出谷
檜附玉芝雀生金鷲靈龜六眸天獸一角嘉瑞沓至理
則昭晰惟聖憲天惟天從欲皇帝曰俞順帝之則時邁
其邦予敢弗力爾其輔予各揚乃職對天之休乎祐永
極

詩

睿謨殿曲宴詩

并序

臣以蒙聖恩召赴禁殿曲宴其日垂拱奏事退俟於
睿謨外次花巾絲履進自東序促武再拜陞即坐席

女樂數千陳于殿庭南端祀帶鮮澤行綴嚴整酒行
歌起音節清亮樂作舞入聲度閑美俱出於禁坊法
部之右於時臘雪新霽風日妍暖已作春意御榻之
前有寶檻植千葉桃花陛下指示羣臣曰抄冬隆寒
花已盛開於是皆頓首曰陛下神聖能回造化草木
實被生成之賜乃先時呈瑞以悅聖情日既中昃甫
畢初筵有旨許登景龍樓由穆清廡外閣道以升東
望艮嶽松竹蒼然南眺琳宮雲煙絢爛其北則清江
長橋宛若物外都人百萬遶樂樓下歡聲四起尤足
以見太平屢豐之象羣臣頌嘆久之既夕復詔觀燈
于穆清遂侍飲于平成萬炬層出彌望不極如星掛
空而光彩動搖於雲海濤波之上戶牖屏柱茶牀燎
爐皆五色琉璃綴以夜光火齊照曜璀璨縱觀環繞
則又覩合宮蕭臺崇樓傑閣森羅布濩羣臣心目震
駭莫有能測其機緘制作之妙者已而陪從天步至
會寧殿瓊鋪珠箔合沓炳煥其所陳列則虞敦夏鼎

商盤紀虬龍文夔首雲雷科斗真若邃古三代之物
陛下既御黼生親取寶器酌酒臨勸命宮婢奏細樂
于前玉食嘉果南珍海錯手自分賜載色載笑雍容
無間羣臣飲德莫不霑醉夜分乃散歸路觀者如堵
他日稱謝陛下申諭一二輔臣俾作詩以紀而臣預
焉臣猥以凡材蒙陛下親擢備位政府曾未閱有此
非常之遇形容頌述雖無詔旨猶當自効惟鈞天帝
所昔人夢寐或至形開而神悟想象莫及而臣今者
身歷邃嚴目擊竒勝願嘗以文字誤被聖獎且面命
之其榮至矣謹齋沐課成百韻五言律詩一首繕寫
上進冒躓天威臣不勝震越之至

上帝通明闕神霄廣愛天九光環日月五色麗雲煙紫
宙開三極瓊瑤列萬仙希夷塵境斷髣髴玉經傳妙道
遙昌運真王撫契賢龜圖規大壯龍位正統乾穹昊親
無間皇居擬自然剛風同變化梵氣共陶甄層觀星潢
上重闈斗柄邊摩空七雉峻冠嶠六鼇連夢想何嘗到

階升信有緣
昕朝初放仗
密燕忽聞宣
清禁來鳴佩
修廊列並肩
獸鋪金半闔
鸞障繡微褰
霽景流庭砌
雷文繪棟樑
宮簾波錦漾
殿榜字金填
花擁巍巍座
香浮秩秩庭
嵩呼稱萬億
詔奏待三千
華歲稱堯歷
元璣候舜璿
冰霜知臘後
梅柳認春前
造化應呈巧
芳菲已鬪妍
椽枝凋檻小
多葉露桃鮮
錯落飛杯斝
綉洋雜管絃
承雲歌歷歷
回雪舞翩翩
黼帳祥氛合
銅壺永漏延
鑄京方置醴
義馭有停鞭
乃聖情彌渥
諸臣意更虔
宗藩親魯衛
相帶拱闕顛
側弁恩光浹
中觴詔蹕旋
寶薰携滿袖
御果得加籩
要賞嬉遊盛
俄追步武遙
騰身複道表
送日夾城堧
仰揖蒼龍象
旁臨艮嶽巔
謳謠紛廣陌
簫鼓樂豐年
赫奕攢輪幟
珍竒集市廡
博盧多袒跣
飲肆競踴躍
著衍開朱廊
崔嵬照彩椽
橋虹彎直矗
矗江練泮
濺濺擊折周
廬晚張燈
別院先餘霞
搖綺暈列宿
瀉珠躔浩蕩
三山島稜層
十丈蓮再趨
天北極却立
榻東偏
既用家人禮
仍占聖製篇
兕觥從酩酊
蟾魄待嬋娟
轉

盼隨親指環觀得縱穿曲屏紅浪蹙巨柱赤虬纏光透
垂葩井晶銜帶壁錢蕭臺千級峻重屋八窻全就席花
墩匝行尊紫袖擅交輝方爍爍起立復闐闐邃宇會寧
過中宵勝賞專鋪陳尤有韻清雅不相汙戶箔明瓊串
攔缸水碧捲規模商飀鑄款識魯壺鐫秦曲移箏鴈唐
粧儼鬢蟬窄襟珠綴領高朶翠為鈿喜氣排寒沍輕颺
洒靜便層牀藉璣組方鼎炷龍涎瑪瑙供盤大玻璃琢
殘圓暖金傾小榼肩玉釀新泉帝子天材異英姿棗萼
聯頻看揮斗盃端是吸鯨川推食俱均逮振餐及墮捐
海螯初破殼江柱乍離淵寧數披綿雀休論縮項編南
珍誇飴餼北饌厭烹煎賜橘懷賴卯醜顏醜寶船言歸
荷慈惠末節笑拘孿放鑰嚴扉啟籠紗逸足牽水輪掛
銀漢夜色映華鸞人識重熙象功緊獨斷權五辰今不
忒六氣永無愆天紀承三古時雍變八埏比閭增版籍
疆場罷戈鋌文軌包夷夏弦歌徧幅員恢儒榮藻茆作
士極魚鳶肯構詒謀顯多男景祚綿迂衡常穆穆遵路

益平平序障今踰隴耕耘久際燕恩漸鯨海漲威竄犬
 戎羶東擬封云岱西將款澗瀍琳科宣藥笈玉府下雲
 駟帝籍勤初播宮蠶長自眠繭絲登六寢稔米秀中田
 廟鶴垂昭假壇光監古蠲靈芝滋菌蠢甘澧湧潺湲合
 教龐風革頌經衆疾痊雨隨親禱降河避上流遷執契
 皇猷洽披圖福物駢太和輸橐籥妙用絕蹄筌此會君
 臣悅應光簡冊編雅稱魚罩罩頌述鼓咽咽詎比千齡
 遇猶聞四始箋羈臣起韋布陋質愧駑駘陪陪機政
 由來出眷憐恩方拜綸綍報未効塵涓密席叨臨勸凡
 蹤第曲拳雖無三峽水曾步八花磚聖諭知難稱才慳
 合勉旃鈞天思盡賦賸續白雲箋清波雜誌初寮進曲
 宴詩序云臣比蒙聖
恩名赴禁殿曲宴云云其祭至矣後尚有二十餘字常
 詞也書之以見國家閒暇湛露惠慈之盛賞賚之序亦
 若是焉曾端伯得於李漢老之子云曲宴詩乃其父所
 作劉季高云乃王履道也曾以疑焉以此序考之何疑
 有之

宣和七年九月二十三日睿謨殿賞橘曲宴詩
 并序

臣近者伏蒙聖慈以九秋既杪四海告豐申惠羣工
特均燕行於時天宇澄霽日景晏溫帝居九重和氣
充塞大昕之初羣臣已集層護外廡趣入就列花巾
絲絢拜手即坐聖顏悅豫咫尺不違天支蕃昌佩玉
在席燕越鄆國而下凡十真王公槐相袞運遂千一
並受其福亦多世顯同升之盛雲韶在庭行綴翼翼
歌音舞節俱出禁坊法部之右屬后亦薦瑞植物效
珍嘉橘瓊橙近秀禁蘂摩自元豐之手種仍沐宣和
之膏澤金苞翠葉磊落璀璨非湘江楚澤下土之產
所能髣髴就摘分嘗香襲懷袖初筵已秩清蹕再傳
珠箔輕明嬪御中出翠鋪高朵金泥窄袂寶帶玉貝
瓊瑛瑤瑟端如遊閨風拱霄極親聽雲和九鈞之妙
御榻之左則上方之寶器在焉觀者進云此碧落空
歌大浮黎物也既稱億萬歲壽笑語無間臨勸不名
海錯南珍手自傳賜上親諭羣臣曰太平無事飲酒
豈樂茲惟其時期以夜分極懽盡醉乃散臣某歸自

朔方預叨齒召天詔念在并詔以內修外攘綏萬邦
屢豐年之意俾奏篇紀事臣頃以不腆之文仰誤殊
獎歸美報上乃臣本志敢不控竭蕪陋仰塞隆旨謹
齋沐課成五言百韻律詩一首繕寫上進冒瀆天威
臣無任

赤伏符興運長生帝應期駿功光祖考大道仰君師皇
極三才建春臺四海熙高高天輔德蕩蕩物由儀政叶
陰陽叙恩均雨露施機緘神不測橐籥化無私黃道星
循軌璿璣日轉規農祥朝自正膏澤夜還滋耕育天田
稼蠶先繭館絲云誰知帝力初弗奪民時嘉種今仍降
來牟此獨貽上方輕賦歛入益勸耘耔陸播頽寧汗露
袂手任龜雨暘常不過高下兩俱宜壠靜無稂莠場登
足秬秠地腴從再易倉富必千斯已覺饒儲待何妨飽
滯遺滴珠香社釀春玉滑晨炊廩膾連淮上帆檣塞汴
涓人和通餽斛家積等京城歲事豐如此天心喜可知
肅霜時既屆夷則律初吹坐弛輸邊粟先共饗帝采遂

蜀陽館薦將迓泰壇釐要與民同樂還開宴示慈紫清
三境邃王府九重披仙掌擎宵露宮樓上曉曦明河臨
睥睨魁斗下采恩鼇負蓬萊殿鯨噴太液池隔城花隱
隱夾路竹猗猗帝所迷從嚮壺中入並隨睿謨深寶構
延福表雲楣象緯層霄逼堪輿一氣移風簾珠的皪霜
瓦碧參差流步來清蹕飄香度赤墀祀光明霽色扇影
弄涼颺御坐花巾擁雲韶紫袖垂僊音鏘杳眇顯氣變
融怡師保周兼名鈞衡稷與夔萬機當暇豫一笑奉疇
咨介弟榮華鄂多男茂本支維城扶慶運聯璧秀英姿
嘉橘爭先睹瓊橙復共持瓊漿封盎盎金彈間纍纍禹
服分三壤湘江接九嶷移根來上苑薦瑞自柔示託質
依天咫懷馨脫海涯生成因道廕造化豈人為嚴靚侔
依鞠鮮濃類染旆陽烏飛啄卵崖蚤熟凝脾不數千頭
富應容四老嬉桃嗤西母獻萍辨楚人疑沆漑溥涼葉
琅玕折曉枝霧霏先嘆鼻香潤已熏肌君賜來相續皇
恩厚不貲觴行筵秩秩樂闋漏遲遲戶響鏗銅獸庭陰

過玉螭畫廊尋宛轉雜珮步逶迤預許留關鑰重升促
履綦再中占漢日八彩望堯眉器寶森羅列虹輝象陸
離截肪傳琰笋盈尺捧舟彙碧落天之秘蓋田地所奇
連城寧復貴曠代未嘗窺水瑩玻璃甕雲承翡翠卮萬
絲縈瑪瑙五色碾琉璃起立紛行綴環觀略等哀歡悰
溟渤隘飲興岱嵩卑御手殮頻輟宮餅酒屢醜翠鈿來
婉孌珠袂列歲蕤閨苑花常爛姑山物不疵流鶯歌緩
緩么鳳舞傲傲別按新傳曲仍聽絕妙詞共看賓醉止
那問夜何其蓮炬光相屬星聯弁欲歌醜顏回紫闥歸
路躍金羈謳詠聲盈耳鋪張說解願摩從書契數卓冠
簡編推天紀承軒后河圖受宓義文心仍翼翼舜善益
孳孳聖治寧人繼淳風遂古追飛輪諸福至投札九州
馳震疊湯聲赫威懷武烈丕款金符誓牧篆鼓兆鬼岐
神力天山箭祥飈太一旗燕雲恢北落靈夏懾西陲曩
歲蒙推擇新邦往撫綏宸篇麗雲漢儒服擁旌麾乘鄣
逾千里留屯閱再葺丹衷忘險阻白首分捐糜井邑今

安業衣冠頗變夷買牛從漢吏牧馬絕胡兒田熟營平
老兵休定遠疲釣天猶夢到魏闕倏來思紫詔過三節
紅塵踏九達載前宣室席復侍邇英帷飲御陪胥樂勤
歸獨念茲喜霑魚藻惠許賦柏梁詩愧乏凌雲筆徒傾
向日葵揚休稱萬壽永御太平基

進和御製艮嶽曲宴詩

臣伏蒙聖慈以海宇又安機務清簡召赴艮嶽觀賞
春候妍暖景物奇勝天造地設名言莫及上尊韻果
南珍海錯寵賜絡繹宣勸稠重群臣荷眷之隆遂皆
霑醉退歸想像恍如嘗至清都玉府彤雲紫霧雖髣
髴在目然已不知其路之所從入矣恭覩聖製仍許
進和謹齋沐率課仰塞名旨塵黷睿覽臣無任震惕
之至

柳暗宮城暈翹塵行穿飛觀認敷春夫垂千尺銀河外
雲擁三山碧海濱地勝煙霞開浩劫花濃雨露近中宸
曲江弭權歸侵夜爭看升平際遇人

銀嶽進和御製二詩

雲峰面面巧隨人
淥淨兼無一點塵
開盡巖英并澗蘂
君王自與物同春

南苞雜艷貢驚春
造化爭先物物新
鏤管裁詩天語妙
翠甕頒醴聖恩頻

重和春宴口號

政布青陽左个邊
春回太極五門前
琳宮就講三千士
瓊籙聯名八百仙
午夜雷霆來艮岳
東風未報出天田
頌觴紫殿君臣樂
萬紀重和第二年

進和聖製元夕詩

并序

臣伏蒙宣示御製觀燈詩仍許和進臣竊聞都城父老皆曰元夕之盛未有如今歲者蓋道化昭格四海屢豐比自立春嘉澤霑浹和風應律河流通駛况復闕庭神麗端樓鼎新五門張燈實始于此臣敢采民謠仰賡聖韻塵瀆睿覽臣無任震越之至

斗城雲接始青天
汴水浮春放洛川
繒嶽千岑延璧月

珠簾十里晃燈蓮五門端闕初元夕萬歷宣和第二年
聖世親逢叨四近頒觴連日綴群賢

進和御製幸太學秘書省詩

臣恭覩陛下臨幸秘書省觀列聖神筆及三代鼎彝
二王行草異書名畫并以萬幾餘暇所書千文十體
與夫寫物賦形之妙分賚群臣移蹕賢關款謁宣聖
次御經幄俯聽講說親紆天步臨觀齋廡右文崇儒
之盛千載一遇九州四海聞風呼舞今蒙宣示御製
詩仍許輔臣進和臣謹控竭蕪陋仰賡聖作干冒天
威臣無任

九譯何難致越裳太平聲教陋成康千年文物儲天祿
四海英髦聚國庠冊府緩留清蹕響儒齋深映赭袍光
侍臣誰草宣和頌落筆爭看立堵墻

進和御製芸館二詩

臣日者扈蹕蕃衍被旨許至芸館及遍歷溪山之勝
初篁解籜新荷布水夏木陰合幽禽間關超然有物

外之趣恭覩聖製謹依韻和進仰贖威尊臣無任
路轉陽華許縱遊南山松竹夏幽幽雲來天半蒼龍闕
波漲溪心白鷺洲隔塢黃知林杏熟連岡青認標梅稠
絳霄樓觀身頻到獨愧君恩久未酬

芸館脩篁靜絕塵渭川那足比封君清陰密覆林間石
翠色寒搖水底雲風好知從宮扇動茶香宜入御甌分
徘徊永晝人需醉歸踏青青徑草薰

進和御製擷芳園二詩

臣今月十四被召自延福宮城泛舟赴龍德西園春
序方中天雨新霽波影涵碧陽曦舒華初葉脩篁解
潤如沐潛鱗翔羽嬉泳弗驚梨花來禽之繁綴玉摘
錦相望三十里探竒擇勝燕賞窮日更紆神筆賜詩
宣勸夕月既上又承聖諭嚼蘂薦酒風味超然群臣
相與極歡盡醉至夜分乃歸再覩宸章謹依韻和進
仰應隆旨塵况天鑒臣無任

仙風吹袂到壺天池館新晴日正妍
罨畫溪邊初縱棹

龍鬆花底緩回船金鱗躍躍依春藻繡羽飛飛掠晚煙
醉眼重窺雲漢作明朝萬口想爭傳

西城春色靜年芳靈沼文禽暖在梁岸艤輕舟泛鷁首
路尋飛棧轉羊腸杯心襯錦花留影波面鎔銀月送光
曾倚披霄高閣望清都自有水雲鄉

和御製白蓮詩 并序

臣近被旨遊曲江觀白蓮賜飲蓬壺堂上晚復臨流
班坐平波千頃大厦十尋芙蓉吹香來襲瓊竿暮煙
高柳映帶樓觀天壤之內勝概第一恭誦聖製仍許
賡續臣謹齋沐和進仰塞詔恩干黷威尊臣無任
十丈層簷日脚留香風吹灑曲江秋石梁架海三山近
玉井移蓮八月稠白雪高盤初縷繭青天露坐晚臨流
夾城飛觀烟雲合端覺身從物外遊

華堂起江江璇榜塞門楫眈如垂天雲始與烟水宜圓
荷蓋千頃高柳排四涯娟娟初芙蓉濯濯清淪漪造物
與奇勝水姿煥相差唐昌玉蕊仙流步光入扉霜寒挈

錄定四庫全書
卷一
青女夜永過月妃
紉佩雜瓊華
施朱笑紅滋
但薰百和香
不染六銖衣
新篇來帝所
天語妙莫窺
徜徉洞庭野
九奏驚成池
恩隆許賡續
萬漏敢固辭

進和御製上巳錫宴詩并序

臣伏蒙聖恩以上巳錫燕西池
方時承平中外衍樂嬉遊之盛
前所未有而春禮隆渥獨許輔臣
至輞川忽於都人士女駢闐繁華之中
覩此巖岫豁流脩篁翠栢物外超然之趣
心目蕭爽恍出塵境宣勸稠疊劇飲徑醉
比再就席則既夜矣恩留門鑰三鼓始歸
扶路縱觀共歎榮遇恭覩聖作謹掇次萬一
依韻和進干冒威尊臣無任

三月昆明浩蕩春芙蓉
新殿壓池濱香飄花外流
觴宴雲擁波心捧
劍人別苑連岡晴
縱目重門飛鞚夜生塵
共欣魚藻千齡遇
拜舞昕朝整鞞紳

進和御製幸池詩

神霄玉闕啟
黎明芝蓋凋輿下
穆清風挾龍舟橫
太液

人從鼇背上東瀛赭黃祀接天光近鳴綵波搖檻影平
持橐此時陪燕豫岸花汀草共欣榮

進和御製大明殿御畫屏風詩

臣比因朝獻扈從被旨獲觀大明殿御畫屏風寫物
賦形妙窮造化生植飛動意備理足蓋聖孝發于誠
心天機寓于翰墨成能獨縱度越今古神靈監觀諒
所欣豫今者恭覩聖製仍許進和謹竭鄙思仰塞詔
恩冒黷威尊臣無任

琳闕靈游恍馭風曲屏親畫孝心通越禽翠射宮簷外
闔果紅垂御宸中堦影近留金瑣碎林光遙映玉青葱
萬年原廟欽崇極更識君王繼序功

次韻趙承之赴穆清殿秋宴

樓殿雲端擁萬靈新規重構帝居成形庭收霧乾坤靜
玉座中天斗極明宣勸聲傳龍尾迴醉歸塵逐馬蹄輕
小儒未預金闈籍廣樂因風耳屢傾

朶樓特宴

東闕年年曲宴頒御尊宣勸醉春寒袞衣密似魁三象
閣道高於蜀五盤一氣已從調鼎順八方今比覆盂安
君王禮貌超前古輔弼頌銘座右看

瑞雪應制

瑤壇親禱夜如何雷逐青華玉仗過翦水乍鋪重屋早
吹花偏入上林多昕朝披霧聞天笑燕序驚春誦帝歌
已卜豐年連四海康衢還解譽堯麼

進和御製喜雪詩

臣恭聞聖諭今冬氣運未當降雪欲興嗣歲請于上
天玉音晨宣雲容霽霽既禱之夕嘉况旋格迺灑宸
翰作詩以賜近輔臣輒忘蕪陋謹齋沐和進干黷威
尊臣無任

呼龍種玉夜相先親禱那憑太史占天借春容裝苑木
曉催風片舞宮簷勝遊獨許梁賓友高卧誰尋漢孝廉
壠麥青青無近遠三農知自帝恩霑

雲車初近紫壇陰報享星光照羽林萬乘欲詞琳館邃

欽定四庫全書
卷一
九衢先雨玉花深
海山出日迎天步
花木催春悅聖心
帝興來牟興嗣歲
三農呼舞仰君臨

乙巳歲喜雪御筵即席和御製詩

九衢歌鼓醉為鄉
共慶飛靈報歲穰
花趨小春飄宴席
天回和氣入彫觴
三銀闕湧雲潢外
萬玉妃朝月殿旁
聖旦親逢賡帝藻
不同梁苑召鄒陽

進和御製南郊禮成喜雪詩

臣伏觀陛下躬修大報
聖意齋莊假廟徠郊萬靈承
事而奔奏則暘陰愾况升壇薦璧上帝垂恩而昭監
則雲月開露裡燎甫畢班賀夙退民繫率育以興嗣
歲則密雪隨降默應預祈回御端闡歛福敷錫嘉澤
周浹歡頌載塗所謂恩從祥風朝德與和氣游者於
茲可驗臣叨逢盛旦獲觀熙事仍蒙宣示聖製特許
和進臣敢不勉竭鄙思仰塞詔旨屢黷睿覽臣無任
竣事觥壇萬玉趨縵紛密雪告休符雲隨太極飛晨蓋
天在浮黎大寶珠喜色生春臨魏闕恩書掣電過幽都

願將上帝居歌意寫作宣和吉禮圖

欽定四庫全書

初寮集卷二

宋 王安中 撰

詩

此在阜城寺中韻所得語還里任伯首和之因
併錄傳冀有相廣者

縠紋春霧輕
簞理秋濤平
天風一披拂
全體有餘清
是中自不惡
我懷陶淵明

層城填華屋
政爾無好風
沉沉古殿閉
一洗萬濁空
端

知黃面老真有清淨功

風襟得清冷世味增淡薄委蟬觀四大縛虎視六鑿中
腸過飢雷益悟非妄作

炎曦正流金涼風在何許障袂日中來逃暑真得暑晶
瑩玉壺冰終不落塵土

日月行天機無意作炎夏百巧求一涼勤我晨及夜君
子有四時盍歸掃吾舍

便涼即嗜眠煮茗還破睡不為蟻穴戰猶尋蟹眠沸果
欲夢何夢應知味非味

小學倚在門大學升在堂象星自伏見兩曜常暉光伊
我思古人踽踽復涼涼

我觀揚子雲不解子與語浩然天地間忍事草玄苦燭
龍臨太空鑿火君自取

讀真語

吾宗相栢君水采極少整吹笙緱氏山策轡金庭嶺阿
香待紫清眉壽亦秀顏僊門定得僊道廕及返永

清娥阿母嬌飛軒來羽野八龍雲篆章肯向人間寫南
真苦論道聲氣覺殊下却携九華妃共詣修僊者

雲林援玉書妙語真達道心中翦荆棘一一種梨枣瓊
軒駕靈風歛下滄浪島有待政何妨象真惡懷抱

劉無損欲書十扇以寄蘇州喬木生夏涼流雲

吐華月句作韻

俗塵雲海漲客慮風旌搖還從不了處坐以一念超深
居炷爐熏偷然帶忘腰養生置莫論吾已陋松喬

宿昔未聞道十年醉幽讀睥睨天壤間萬事真破竹今
來知自笑逢場罷竿木猶餘勸綠心留賓與更僕

學道辦何等日用四時行夢尋湯餅到風入茶甌生忘
機心坦坦詣理言平平誰同坐清夜籠燈對微明

出門趨雞晨還舍結僧夏緣隨香火慣跡涉林塘乍便
恐住山侶麾手謝俗駕悠然指此心是中有餘暇

玫瑰紅被徑薜荔綠走墻風埃林籟起中有楸花香緯
蕭隔雲霧烏鷄自回翔聽下轆轤聲心與古井涼

枕玉裹蹄琢簞波人字流水甕貯清泚意境已生秋睡
餘弄蕊軫山高水幽幽試作文王操若人還見不
一勺淡薄味三生知見熏茲游聊忝耳翩若出岫雲弋
有孔翠羽寢有虎豹文吾寧不堪用渠亦何所聞

魔環淨名林發納柳季戶由來道力勝婉變莫予侮菱
花百鍊精炯炯寒光吐森羅萬象交過即不得睹

成虧繫軒冕心地生眼花極知一餉靜可掃兩鬢華琴
雪同卧起風月通貸賒高哉彭澤柳不比邵平瓜

柘漿工析醒卉醴可消暘客至亦不踈沃此蔭清樾道
人有眼句翰墨相應發勿隨標指看舉似團扇月

春懷賦得冰雪鶯來晚春寒花較遲十字 案原本缺

遲字韻一首因無別本校補姑仍其舊

深居足移氣薰爐坐晨興春來獨何覺湯餅夢騰騰永
懷山中人遣花破寒冰一枝便有餘經眼知吾自 比見小桃折枝

春寒殊未休春事不堪說陽谷溜微綫陰崖削精鐵森
然十八公鬚髯滿殘雪非無料峭風翠色已可悅

寒雀隨山影哀鴻帶邊聲花遲社酒薄春工了無情東
風好池館芳草語流鶯不必笑枯索擁書輕百城

幽窓鎖雲霧無人誰與開燕燕尾涎涎知尋簾戶來春
風到書律溪藤照山煤任爾擇家舍梁塵飄硯臺

種梓期十年執蘭盈九畹河清會有時歲月生成晚向
來忝聞道及此且求本行樂未渠央何以語羌蹇

文王有遺操朱絃韻青春無言獨下拜頎然見長人道
喪向十載詩書絕逼真逼真猶不盡試語老斲輪

淵明苦長飢中年求一官歸來蔣松菊頗覺生理難我
恐須出仕未出心已寒好謝山巨源作吏廢遊觀

趙公丈人行佛隱踏朝靴風流漢北海人物魯東家同
行得劉子過門抵昏鴉臨分無長語進德除空花

子崇

趙公漢劉

吾宗有子明粉澤之外貌白衣罷秋賦深林藏霧豹談

經亦微詆樂實在名教擬之金馬生笑云恐差較

王子盤

同郡李達之貢辟龐偶試不利還鄉及河不得

濟作二詩凄然讀之殆難為懷因為次韻極其
悲苦卒少紓之當煩劉元忠彭少逸同賦

客行天雨霜屨穿敢留跡欲濟河冰漸蛟龍情不測去
住兩更難凄寒斷消息

顛風無安巢墮翼思故林誰回太陽惠照此窮谷陰扶
持孔鸞輦矯矯翔千尋

用大名諸公唱和韻送別少逸

宵濟洶濤波晨征犯霜露倏來忽語別何所見而去疑
君略奉高或我媿叔度慨然陪節傳邂逅莫忌故

初歡記鄴城往還數如織搏風回鑿閣相賞垂天翼君
席今未暖我井久不食駕言又何之游交請絕息

當仁語卒吐仗義身不謀所賢我者遠甚薄物之尤不
莊坐麴蘖欲收醉鄉侯微辭致責備近頗學春秋
邇來走筆吟別後隨手散收拾亦安用半是諧謔間不
能所作工要解風水渙莫以人廢言遂忽博士謾

和李達之庚寅秋雨三首

閨餘氣先寒久雨愁更劇丈夫固遠慮奈此朝不夕恐
汎有危行扶歌無安宅我思補天漏試鍊五色石橫空
收洩雲屏翳敢停跡還我陽秋思與子兩相適

客舍無晴陰日赴折簡喚家居跬步隔心念旌旗亂釜
空雨生魚遽敢議薪爨裋我自抱更為子三歎

鄰僧雨不出粥飯聽鐘魚事與吾輩異一身易羸餘而
我千指家食此半編書飢驅欲何之投瓜望瓊琚側聞
州禱晴早願光景舒祠官莫憚煩霑濕祇臺輿

再和

長安貴公子對雨飯正劇明缸艷華屋今夕知何夕豈
同揚子雲友閉一廛宅稍醒問予酒已復憂飢石賢愚
置莫論晚仰共陳跡世路日參差咄哉隨所適

霖霖連十日茗益闕招喚寒盞味獨辛秋爾緒仍亂憑
將苦雨詩高絃韻餘爨果無真賞音落魄不須歎

向來天不雨噉泣歌枯魚今來雨彌旬粒食還無餘兩
家各四壁但聚古人書群爭聲利場欲趨顧璜琚豈敢

喪所貴我行自安舒寒飢雨未救杯水沃薪輿

郊行感興

邊風吹鴈寒雨宿黃蘆下家雞飽遺粒喔喔庇簷瓦孔
鸞爾安巢慎勿翔中野鮮鮮野畦菊的皪弄深黃馨香
不自暖白露淒欲霜明朝紫茱萸雕檻薦高堂

試院對月

我行無町畦忽逐春波起平明發鄴城莫宿清河渙譙
樓唱晚靜驛樹驚颿馭亭亭華月上熠燿繁星委含暉
穿幔翠度影入窓綺悲來興視夜空庭縱幽履飄如浮
海仙飛步不濡水

無題

秋蘋一寸風吹我鄴王臺臺邊委黃落總帷化飛埃平
生三迳步履齒粘蒼苔羈棲望不到蠅頭寫歸來人間
持板手欲展何由開再拜丈人行卷投當瓊瑰丈人龍
眠龍一作英挾策奔風雷毫端須臾寄一挽正始回年來
心法孤駸駸一作冷古爐灰淵明不並世此士誰為才紫

鸞固翹詣白鷗竟何猜所期豈朝華歲莫儻相陪

張公作高陽醇酎送幕中揚時可作詩詩成亦

得酒而瀛淥又將熟揚復垂涎及揚韻

平生顧建康名下難為人見其似者喜敢復聖賢分元
候惟翹葉好賜均無貧萍官新荐熟蓮幕先飲醇生令
染指客詩語生冤親相黃松小苦賦筆久埃塵何時獲
瀛淥更可調陽春

次韻揚時可李元中酬贈之作

初年種交梨可奈荆棘樹聞道千聖前不傳纔一路彭
殤幾許爭端作且暮遇衣珠價連城誰遣泣窮路了知
無生法未短飛昇數當身認同歸絕學何外慕龍眠王
頰翁是中得深趣蕭然住山人妙甚垂天賦我為揚侯
計政欲借前筋從翁頰及今頰脫戶外屨

次韻王得之遊福源觀

維南國裡祀崇丘五雲解路轉樓居出林深步虛傳輜
輶上真侶鬢髻太古仙綠章下秘祝寶此一掬泉至今

爭晨門奩香走瑱然帝子留繡蓋宮嬙擲金錢吾宗初
意行跋馬稅芝田醒心影娥池了了壺中天呼兒話西
遊乃未得汝年先生筆壯鼎小友語更妍斯文到真處
扼蠟漫買鞭賡酌就俄頃驚絕圖書淵覓句念宗武愛
竒容子遷遊山本庭戶可但巢其巔眼中摘文地生待
步武連幽尋賦異日端為續膠絃

望法華山懷慈上人

我無適俗姿發興在林嶂前身一義墮好山輸百丈永
懷住山人敗毳裏龍象頻驅塵外軫徑抵雲雨上道人
初恠問斗絕何從訪師居不難尋天壁愕異狀風煙自
蕭散草木更森長道人聊復爾仁者作是想重來傍岑
翳眠淨神亦王虎谿雖不遇鷲嶺聊得望遙知師蹶然
跼跼又安往

過安平小集

王鮪未荐春永歎念河曲遊子懷故鄉書劒就裝東橫
流一葦航歸日三秋促屬驂饒陽道解鞅獲館穀鳴鳥

尾畢通喜信亂城角邑中二王子彼美温如玉行李往
來者東道禮尤篤一尊相勞若挑瓜間紅綠深巖布金
地良可避蒸溽呼龍勸客留雨聲裂葦屋諸公氣吐虹
不鄙余錄錄號呶叫博盧露跣圍奕局漫即本何者蒿
蓬倚松竹更不效天隨淒其茹花菊

湖山紀遊

吳山東南秀葱鬱盤帝城而湖據其趾御氣通波心餘
膏被草木蔚眼皆欣榮今晨天宇穆惠風汎初晴春色
正妍妙放懷共揚舲中流入汗漫曠闊無埃氛湖光挾
山綠倒射玻璃青絲竹響空翠樓觀森崢嶸獻酬雜歌
嘯爛漫紛醉醒取樂固莫並興懷一何深緬惟昔三賢
精爽日以沉但餘畫象在尚想鳴佩襟希古秉微尚崇
雅摠恬情羗予翳蓬藿無復企組纓澹泊自有得榮華
非所欣舍舟縱散策逸興生峻嶒白雲引遐眺碧岫延
深登幽期浩無涯忽到靜者門長松有令姿流水無俗
聲絕磴猿可呼出谷鶯始鳴乃知物外境茲象本不驚

逝耶初無將至耶亦無迎便將謝塵鞅茲焉支頽齒山
鴉接晚翅落日催行旆歸歟賦新篇聊復記吾曾

貽梁東卿

激

結髮抱竒趣被褐深自珍空腸貯明月坐友千載人長
飢為驅出宦遊古河濱侵尋簿領書陸海縱埃塵沈還
誰復見無悶日湮淪使車重皇春賓從實要津平生相
與昧數面輒成親如何水霜別邂逅梅柳春我來閉空
館公歸捉輕輪咫尺不得語寤歎良苦辛

送曹文叔

讀書無見功要足補吾拙時從千載上坐友萬人傑心
源貯古月表裏湛空澈政緣老懶故早覺追隨忝推遷
懷短檄甚愧固窮節安陽耆舊衰風來漫筆古翩翩阿
瞞孫乃出諸掾列爽氣不可招敵榜近縲紲只今官罷
休道學歸澡雪加餐一言足人事會有別

奉酬李道源供奉

斯人倘遇真何必吾黨士向來風騷伯領略罄同軌仙

路共飛騰雞犬近天咫但看橫槩語力足走餘子小詩
賦競病政自賢乎已眼中管陶郎翰墨頗自喜當官故
癡絕捉扇談名理早時隨計借晚墮鶻冠裏史君社後
文此面惡難擬陸機生不識尚想汗顏泚只今官罷閑
高唱動連紙齊西井邑富三月花事起人竒羨波同物
勝斜川似遠心破城府快論注弦矢嗟予懷檄書寸步
畏仄李投床夢婉婉日永貪睡羨亦思陪君嬉靜釣濠
梁水君方事蠶繅問津從隗始十年投筆興氣已無萬
里努力就功名爵祿天下砥

次韻李達之十月十九日風一首

葛製侵中冬奈此河漢泣障門特織蒲更值飛廉怒春
撞不遺力既發寧却顧陰機足自由盛氣尚誰怖老心
百念灰一睡美無度投牀逼窻紙罅穴響交互飄雲半
夜入方夢踏雲路帝居環玉闕恍惚北常遇回天力故
微訟風詞已具

次韻李達之冬日自紀二首

短長不相懸視此律筒換天寒今幾許冬序已強半初
陽來如縷殘歲去莫絆親交斷還徃官列閤稱喚無牛
可扣角問夜何時旦新詩當美酒排遣孤悶散風期終
未沫相與遊汗漫

古心出古語不計彼不聽蹉蹉來問學政有童九齡尚
有一事大更讀四方經但我鮮兄弟諸妹亦伶俜皇皇
門戶寄孤耿如晨星何時休世網遂逐鴻俱冥君窮坐
如醉聞此或少醒試憑道力勝兩忘楹與筵

達之質衣不售作詩某次韻達之有田在蒲陰
日以侵削舊居嘗質人家既還而井亡於是篔
簹益艱故有爭畔改井之嘲

顏癯雖回堪幸列聖科四歌篔簹顧自給所樂真細事君
窮欲誰依月旦無高議隣貪故爭畔困收復易匱吏憎
輒改非甕汲亦難致空有能詩聲度越侯叔起時裁乞
朱帖韻綴古風裏嬌憐啼門兒愠柰曳泥婢喧喧聞發
廩共詬管城子君云始安之吾肯屑嚙爾篋中敝袍在

質當今可以擣窓承腹生列肆跨兩市掉頭相閉拒竟
日却攜至似云儒酸慳所得毫髮利寒暑遞回換錢出
幾還此由來刺繡工不如市門倚以彼居貨心必求速
化理近聞高貲郎禁與士夫齒蓋防駟僮態歲久薰蕕
似象富乃良規力古貧莫恥

顏夷仲有次韻少無適俗韻詩少逸既和之不
可不賦

少無適俗韻市朝等居山所思魯柳惠去我今十年官
曹不厭卑危慮忘冰淵身恬道故在心傲蒙漆園顏丞
賞我趣屢顧塵埃間我久作常語何得君來前東歸散
俄頃翩若風中煙此意念莫領搔髮空垂顛出門久無
味不如杜門閑君方篤行李諒以吾言然

次秦夷行觀老杜畫像韻

寒拆天吳圖飢糴太官粟拾遺官在朝何異老林麓英
風想廣蘭妙手傳顧陸蒙茸頭傾冠駸駸盤脫足熊兒
與阿段左右相扶逐生平經綸其帳望青蒲伏窮塗付

麴蘖放意謝羈束草堂幸無事尹騎時見辱清吟動霄
壖逸艷驚魚目顧茲神明意豈易丹青卜當時腰長鏡
憔悴十指禿聲名乾坤破生事歲月促但聞列仙癯豈
見肉食墨企予攀逸駕短步羞匍匐不能師廣袖乃爾
好竒服嗜詩得雋永徐味自當肉不知褒公貴顧謂何
郎俗窮通等夢幻思慮自振觸苦吟祇劫尤呼醜進蟻
綠

次韻荅任德夫夾灘見貺長句并呈崔彥聖

我本可笑人略已近俗士侵尋久未覺大似城門軌永
懷北山路相去不容咫雲煙迷舊隱雞黍誤幽子極知
田二頃足了仕三已世緣成錯料悔不妻法喜只今無
置錐四海寄生理因循插手版俯仰鄴城裡朝來對爽
氣或以古人擬頗復廢將迎陶泓弄幽泚翩翩取自適
豈問書費紙推移從短檝此念初不起園林齊地近人
物何郎似無因覩白雉漫自手弓矢任侯十年舊邂逅
慰行李新詩多態度譽我傷溢美君才老益豪筆倒三

峽水我將觀浩渺萬事問伯始是問好首客風味化鄰
里亦知崔亭伯更欲就礧砥

送晁之道

人才限南北河嶽日邊徼異時頗自振以遠得輕笑顧
我尚友心與渠不同調吾州向雖陋屬令文元宵仙鳧
謝雲羅雪浪湧海嶠問山如登天翰墨相焜耀高標快
目擊勝語醒耳剽永懷種秣潛不翅憇棠召八年杖屨
隔坐睡夢嵩少何人似嚴陵寒灘理幽釣無因接孫登
半嶺聽清嘯漸恐落流俗中夜回光照倒海覓三珠更
復得二妙風埃鄴王城晚從折簡召倉曹賓客次玉立
見孤峭神絳森挺脫俛嘿願還鞘至今牛斗間寶氣干
兩曜伯宜承華劔仲合典書詔翩翩誰輩行官職忽哄
叫羨鬚草未闕好面喪可吊斯人但寂寞瑚璉不薦廟
我嘗當饋嘆吞債類牛噉淵龍豈易擾遽敢議虔劬念
昔忝聞道銳甚冠始醮百憂荒寸田孰與耕新燒區區
冀有獲韞鞅鞭復掉端來求代公元守信麥漂便將塗

六鑿風籟息號竅政自畏扳援拄頰遭詬譙一官涕唾
了得失已懸料囊中飡玉法朝飢儻能療縱無錢買山
解有杖荷蓀從公問箕頴策足事游眺共待四明歸重
巧一言要

次韻和彭少逸送晁之道

吾軍久不張建鼓覓同道蒼黃一二獲便作百萬號我
行初濟河首得晁彭耗輕車駕馬駟馬邂逅王良造悠然
望八極頗已快速抱兩公前後輩凜凜不殊操晁文早
緯國輔以家學與向來宏詞出古氣軋盤詰蕭生寧抱
關肯補郎衣皂老成吾猶及孝友神所勞彭詩動驚俗
祖屈實自悼追竒詣岑險展讀眩欲既知名漁父篇雅
愜志和好勿前丞相嗔何恃翰林傲方將摩二壘併可
嫩雙瀑瓜代苦敦薄火攻良抵冒荊州一半人纔尉阿
堅到只今事行李遽欲戒騶導箕山老仙伯遠引避喧
噪紛紛戶外屨王沐安無躁仲氏往吹簫吾黨端有靠
坐念玉壺冰鉅堪風日曝魯公屋漏筆莫靳平安報否

春等時雨春早必秋滂努力加飯飧自餘何足禱無卿
我定豪別語願忠告睡翁頗少留意適如爬癢大臣不
暑行官小奈親老網羅今轉踈機穿豈重蹈得失儻未
量天理問裨竈

長句送之道既辱和答而夏傳聖詩亦用此韻
之道復和一篇篇末頗及小逸與不肖因再賦
此傳聖姻家書問必數或可達之道

癯儒緩趨走不堪備游徼古心乏嫵媚亦莫齒優笑十
年營負郭畢願了租調詩書祝兒輩風味久必肖文窮
覓退之錢癖減和嶠此計墮湫茫浪出豈炫耀官供取
無恥幾不類稚剝退食獨委蛇顧欲輩周召誰論玄尚
白端覺壯非少緬懷十載入有道混屠釣風雲隨闊步
功業付長嘯事成有辭爵緣斷或遺照飛潛無必同出
處信俱妙肯以牛衣泣求因狗監召竟知貂尾短何益
鳶肩峭士初如大刀天高看拔鞘提攜龍雀環瞻破勒
與曜斲蛟剝犀兕左右隨所詔用舍要有時遽欲帝闕

叫沾襟豈終悔失馬勿前弔龜寧行曳泥犧怯牽荐廟
但逃明火灼詎壓短芻噍固窮而山立吾儕當勉劬無
禍福莫長安用綠章醮我今百念灰內熱息心燒來親
晁民賢不住頭忽掉淋淫雨十日坐恐行囊漂新篇寄
鄴城鐘磬逼耳竅春撞到彭夏餘子敢輕譙是公天機
深世故成錯料良醫百遇毒彼已病俱療淵明寓託遠
捉扇贊荷蓀吾將急捕逐八表寫長眺遲暮儻同歸升
斗何足要

李永終還京師北嶽王某以送晁之道韻作詩
贈行某外大父賢良裴公實為邯鄲公行狀契
義良厚故見之篇首

外家東眷裴典學不觀徼初未接諸彥半發士龍笑賢
科兩過閣萬字出戲調盡記十二題博洽古人肖亡書
問安世多識數華嶠劉蕡廷策許罷去終弗耀縱橫五
車讀未提一律剝生涯日蕭索更甚東陵石當時邯鄲
公似是洛陽少文濶淮南草詩賡苑中釣殿廬忽厭直

郡閣或坐嘯相從賓客老莫逆肝膽照嚴詩見杜集殆
極天下妙鵬來蒲州坐永隔宣室召門生狀董晉寒筆
信雄峭豈慚吳季扎墓劍掛遺鞘嗟予乃裴出母賢如
德耀授予其父書勉使起應詔此文載編末疾讀快欲
叫者舊成鬼錄零落真可弔但聞康靖第萬軸闕家廟
子孫同蠹魚竒字飽咀噍始予識京掾已嘆才業劬叔
分秉周禮莊若客位醮官閑恣討論燈火親夜燒固疑
言語工未睹寸管掉高篇晚發伏疲兵血爭漂予拔中
山毛載頡從八竅携持託抱闕免以不敏譙規容曹參
隨敵敢揚雄料寧憂無肉瘦政恐俗難療冥搜癢曹務
招隱暮芸蓀子行擇所向山水足觀眺慎勿厭家鷄造
請歷權要

定武贈晁之道

晁時為
無極令

北山立雄秀西山儼來奔稜層上雲雨祕邃錯朝昏風
霆倏號怒勢欲立厚坤茲惟神靈宅可但人物繁嵩陽
擅月旦問山等龍門謂我山之英重以仁者言丈人蓋

代手脫口千載存尊羨與羊酪不復疑戲論向來無極
 神解與君爭尊堂堂甄孟成版籍見諸孫如何置不問
 遠借寒谷暄我行旁鄉祥念此永弗諼逢人試語似喜
 色凌朝曦問公誰輩行故侯蕪季昆故侯遺妙墨龍山
 龕山軒亦有好事人醉帖收蜿蜒神明坐還觀聲淚已
 復吞公能破紙尾師友道彌敦要當藏名山仍意作九
 原續絃煎鱗角併洗萬古冤

一云萬古無纖痕絕勝
 夸毗子空臂得瑾琨

顏持約為范師厚作孔明坐嘯圖十大比丘像
 觀者以為輦訛不可不下一句

窮顏妙畫今虎頭忽以武侯為范侯他日卻寫十比丘
 下筆不數僧貫休作佛作相三昧游在江在海兩浮漚
 丈夫心機入法流到處還渠第一籌

寄謝任伯謝時為定
 武學官

盛樂宮前紫府君開花流水不知春悠悠永嘆坐石室
 自有此山無此人我來婆婆娑弄明月松聲草色俱清新
 列仙元癯不佞佛却語小謝求綸巾明經使者風生在

文字政須君等輩，鴈門鴈美亦思歸。講肆還當尋馬隊，
金鳳臺頭我欲僊。故人真謂翼垂天，目光射落三千尺。
詩律追還五百年，應緣又踏瀛州土。寄問騎鯨今好否，
俗情限量須破除。可無忘形我與渠。

崇寧寺詩

周郎同歲小一月，老氣凜凜能摧鋒。佛隱由來足高士，
經綸正在阿堵中。平生蓬藿一畝宮，頗與可人風味同。
好在江南香火社，寄書會憶王牆東。

次韻張應龍見贈長句

深居聽客譚西山，舌端肯翠生層巒。山形卓犖尚可相，
客趣超詣何由攀。漳潁空回自不韻，夢涉山澗波旋環。
但携雲根萬竅碧，歸置毛穎陶泓間。客真與山欲爭秀，
煙霞氣足詞高閑。我亦良非適俗者，分山一半同君還。
同元忠小逸登大安閣各賦一篇

胷中堆竒忽塊磊，徑欲憑虛尋我對。梵宮日月擦鷓尾，

複道雲霓湧鼉背佛將高廣快心賞天為空長舒眼礙
水層蹙岸見河漳雪氣明山數齋岱安知一身寄城郭
却指萬頂者闐闐承平大駕昔此留望幸遺民今幾在
哦詩人物到白也題字風流希湛葦北都三士行作圖
勝遊一日不可廢

顏夷仲欲赴藍田丞而鄆帥移雍姻家或當避
讀夷仲詩為和第二篇此次退之山石韻者

秋蟲不量翅股微幾欲唐突鷓鴣飛高梧嘶風食沆瀣
何似死鼠鴟鳶肥顏家事業更清絕者舊去眼知音稀
賢哉鼻祖井故在執瓢便足忘君飢一官晚悔登龍斷
經歲不出關荆扉藍田之山石韞玉白虹千文晴霏霏
退之壁誌見髣髴二松閱世應百圍丞藁未換渠莫惡
柳江仙伯容樞衣側聞親媪又齟齬漫恐髀肉摩鞍鞵
戲人造物亦薄相咄咄此士將安歸

趙聖符權漣水軍使按周立事且去猶聞上乞
不赦為作長句

穎川異日剛彊守諸吏僵仆姦豪走濟南史君羞怯懦
故破矚宗三百口官為聲名計則多尋常手滑如彼何
心知昔人不妄作隨事斫斫或拊摩河神娶婦理必往
城北殺子吾當訶襄潰趙侯世儒雅軒昂忽變腸無它
奴欺主女積十載侯以半紙申嚴科人言趙侯廣漢後
宜有擗伏如神手青衫諸掾日蹉跎衆或屈凌天自佑
誰過襄潰刻石傍告以吾言慰耆舊侯今兒子能文章
母太夫人百歲壽

過客有贈達之金者達之作鮒魚乞水急詩謹

次韻

李侯茫茫悲欲泣人生豈能無緩急晨炊米盡抱衾裯
富兒操金森壁立縱橫文字對空虛肝膈不同如燥濕
寒鄉眼界太褊迫名譽纔高憎怨集誦書把瓊九河懸
雖我亦驚追莫及風雷會送橫海鱣躍上禹門過千級
奈何自比轍中鮒商歌感慨行人揖鮒魚不願決西江
李侯所須惟粟粒肯捐一滴活波臣客真義動修蛇蟄

得金遣客曾莫留索我和篇何汲汲孤竹之管空桑琴
已矣今人聽不入

第二子赴河間詩人皆作詩送行讀趙督辟疆

詩為次韻

家世無人仕茗浙送汝還為北城別河間知不去吾遠
汝母猶持離袖掣中年生子今官游吾與汝母宜白頭
中山西望三舍身諸老汝近吾何愁官傅恩憐速猶子
宮師應行餘五弟至今鄉間尚心化友愛推高一門裏
向來寒甚草根蚤邇來出入軒蓋從富貴不願此身獨
安樂幸與諸老同門戶固應多國器汝往豈為功名會
古文科斗書車娛人翰墨真餘事客程搶笠風卷紉
歸及諸老醉榴花京華新聞勿用說一時名士詩可誇
題李成山水
五日十日一水石此言雖王蓋其跡請看天地開闢初
豈鑄日魂鎔月魄忽然而成隨所遇納護風雲元滿肚
吐為千偈口瀾翻遊戲法中同一趣李侯落筆風烟起

妙處欲回真宰意扁舟不動水粘天落日孤明山若倚
斷猿吟掛清楓林澗松倒卧猶十尋白鷗似作終老計
浮雲自在年何深由來神品完天力一抹江流吞萬積
寸量尺度但形摹畫史如山爾何得貴人費盡千黃金
寶奩玉軸誰敢爭一聲常賣落公手世間得喪誰虧盈
我生懶率便踈放只有幼輿巖石相它時真作畫中人
儻辱書來問無恙

次韻題李公休輞川圖

山林策足高復高俗子捷宦爭秋毫丹青邂逅著相袞
晚顧不欲傳兒曹妙哉吾家右丞相睥睨一世輕鴻毛
雲泉招隱去甚勇粉墨狀景隨所遭輞川莊圖最得趣
畫寫象巘圍長臯廢城荒煙颯衰柳斷澗立石淙驚濤
筓負篙插屋伴幽讀蓮芰潑眼橫輕舸宮槐猶是鳴騶陌
漆園已作蒙莊逃地因人好自竒勝豈必海嶠騫鯨鼇
想見解衣盤礴時六種震動山靈號平生經行意境足
朽木不運筆已操小詩氣象更清絕遠跨陶謝追風騷

樂安老人吾莫及摹搨髣髴收藏字隸書十詠有體法
鉞肆見此古赤刀一時墨妙誰竊去龍劍飛失餘環條
只今跋題乃到我千載吾祖安敢褒家鷄詩畫愧弗學
但思卜築誅蓬蒿輞川久無書契在未免四海求田勞

大風

青陽乘時木當行驟辭因幽置高亭驚驕媿豪怒奪
睥睨萬物憤以爭潛呼飛廉語曰御媒妁阿巽助躁輕
林交社姻窟昆兄腰領搨持劫詛盟獲顧鷹隼深目睛
沐猴冠元加絃纓約束陰定陽眎瞳鞞囊革索齋露呈
頃刻翻簸揭奔轟捲幃裂箔仆旆旌墮簷塌搨掀架棚
注射垣墮穿家塋豹彪獐豬狒獠猩鴻鴨雉鴉烏鳴鶯
殷蹶捩翅突奔驚蹶抵犖确冒灌捏蒙衡十車屹傳城
撮槩萬騎鴉譟營步趨宕跌忘珮珩宮徵嘈雜停韶英
披木榦根塞芳榮蹙水濤浪虺鏡平眯霄耀靈一日盲
觸山不周八柱傾六幕擺撼始稱情神嬉鬼笑語呻嚶
餘噫不收爛哥賡聚穢勃鬱封觀京執攬北斗斟四瀛

金定四庫全書 卷二
五嶽為豆羅崢嶸腐株蠹穴侑筮笙醉牽月娥舞金鉦
更持一椀壽長庚誰省天意不汝令小臣叫天吐丹誠
方春風暴稀所更執法口噤臣輒抨幸屬廷尉殖鯢鯨
天哀愚忠勅閣丁往呼來前密訂評竦身躡虛倏上征
涕洟拜手盼睥清臣材瑣屑不足名中有姦直肝腸撐
自下議上罪則烹察及螻蟻帝聖明臣知風暴不難平
惟斷之果絕蔓縈帝首微頷慰遣并側聞雷霆掃攬搶
山恬海靜悄不聲濯濯生意回枯頽搜詞譎紛縱橫
及風大熟想姪成

游峯山院

蕭寺倚絕壁高軒憑衆芳僧窻得山翠茗盃仍花香眼
界寫雙淨心田增寸涼陂陀日向夕村落下牛羊

次韻李厚之秋日即事

時在
試院

當暑獨披襟誰同染甫吟山林勞客夢簾幕斷人音庭
籟迎秋靜宮雲榜晚陰賴傳詩句好偏慰未歸心

試院作

身入儒宮作抱關不妨文史暫偷閑秋陽皜皜天新雨
晚吹騷騷木落山士子便應務兩監吾儕未合老三間
孝廉同歲真同道對幕哦詩斷往還

聞青守梁元彬移帥定武作詩寄賀諸梁

相門誰數十朱輪華鄂今看節制分鄉里正思前召父
朝廷難輟大馮君風聲自是填荒合忠力同輸手足勤
應有池塘春草夢夜闌還繞北山雲

聞帥府大閱軍作詩送梁帥

坐想郊坰鼓角雄弓力十萬擁元戎令傳帳下偏裨慄
聲走山前部落空勒石何須稱竇憲友風已卜相周公
自嗟不預從軍樂賈勇猶能氣吐虹

和梁才甫贈定帥元彬

汝水衣冠記昔年明堂一木起扶顛孫枝競秀傳家學
華鄂聯榮握帥權西省覩摹留閫外北園風景仲樽前
晉陽親近皆兄弟行集天朝拱細旃

無題

玉府真游擁萬僊
藥珠深殿駐雲駟
官尊自吸瓊漿盡
御筆猶封寶字全
密護幾重香冉冉
倒藏餘漑響涓涓
君恩許侍神霄仗
先向壺中覓洞天

讀次文漢陂詩

白髮郎潛舊令君
東軒携酒幾回登
當初天上化鳧鳥
今日人間下馬陵
邊地久無能賦筆
懸齋新有讀書燈
昔游零落岑參在
故語流傳許十稱

次韻魏端夫田石送赴試詞學兼茂

謝韞歸寧雪載塗
新詩還道絮何如
時因公子監門會
頗識中郎阿大餘
賦筆久無三峽水
囊書老趁獨輪車
只今靖郭家凡舍
誰似先生食有魚

一作寄聲靖郭家兒道

澶發宗室伯言見寄為次韻

賓客風流追七子
宗支文物笑諸郎
青藜吹燭書編亂
古錦作囊詩卷長
禪鉢芋羹聊得共
壽杯酥酒故催忙
祇今霜雪休車馬
誰對熏爐語夜堂

次韻元量貺詩

野性由來不受羈，
可堪風雨斷追隨。
卜鄰有素須歸隱，
會面無多更話離。
拜我低頭要晚歲，
仗公取水記當時。
魏城邂逅猶惆悵，
秋鴈橫汾奈土思。

送徐幹臣

聲華飛動水雲鄉，
揮翰初宜玉作堂。
投老肯留賓客榻，
臨分聊屬聖賢觴。
家山到眼千岩秀，
世路收心一粒藏。
趣駕青牛尋尹喜，
著書方便設津梁。

次韻道勝冬日惜別之作

相逢不作白頭新，
肯復悠悠問大鈞。
煮茗坐窮西寺日，
哦詩驚動北州春。
吾儕漸可傳書種，
兒輩當令洗塞塵。
節物崢嶸君遂去，
驅蛩終始覓何人。

次韻安喜劉簿上梁才甫瑞蓮嘉禾一首

早日商霖浹四寰，
兩年春令塞垣班。
秋清蓮萼駢幽沼，
歲稔禾頭合舊山。
州有嘉禾山事付史官應制可，
曲翻相府看公還。
王褒要是邦民爾，
請頌中和敢自閑。

揚時可屢遊朱氏園，
昨日方一載酒甚樂因次

韻言其事

溪上桃花如有語，怨君前日只空回。徑須留客車投轄，相與澆愁酒漉醅。我自馬曹聊復爾，誰憂兒輩覺追陪。王郎醉墨題名處，約有餘尊可再來。

次韻和梁才甫上元詩二首

雪夕張燈白晝同，坐知酒價長新豐。月來方丈三山外，春在元戎十乘中。王塞已傳台寨拜，火城先看相家風。公歸端是千年鶴，回首鵷行一夢空。

陳橋陪乘五人同，劔鉄休彈禮過豐。驥足爭先長策下，

蛇脂乾盡舊山中。

某前歲與開丘唐汪魏隨府北來始集於陳橋傳舍

敢將野句

酬明月，但記宸章起大風。

公家有上元御詩

默對短檠悲曉晚

緜袍恩重報全空。

次韻和梁才甫與曾叔夏喜雨

金節經過上帳開，初筵風雨燭花摧。鳳凰池外濃雲合，獬豸冠前爽氣來。已洗郊原秋淡蕩，不妨星月夜昭回。拾遺說尹村村到，盛看豐年社酒杯。

次韻趙承之九日出郊

結客西城昔夢長無題重和不成章老看殘菊情多感
靜數冥鴻首屢昂餹酒故應隨節辦絲桐政好為秋張
鞭笞鸞鳳饒君去獨守庭楸坐夕陽

喜雪贈梁幾道

風色蕭騷晚尚微呼龍連夜布寒威欲尋海上三銀闕
先舞雲中萬玉妃難老松筠增氣槩未春桃李借芳菲
典衣更為來年賀潤澤先從宿種歸

觀儼

天回星斗臘將殘儼仗歡呼陛肩寒逐癘已隨三闕鼓
鍊真何待五辛盤皇居夙有僊官護民瘼兼憑聖錄安
歲歲更修周典禮都門耆舊喜同看

嘉山

北嶽嘉山之陽吾先子之所葬頃因掃除數與道人
學子留遊村落間田無咎之廬可想見其處為作詩
無咎歸或為書之屋壁也

喬木相望十里村百年弦誦化耕耘食魚誰就田文舍
下馬先經董相墳烏凡繙書心自遠紅旗賽社酒初醺
何時結客嘉山路剝啄敲門却訪君

次韻梁才甫游苑氏園

地僻風光到復時誰吹律琯轉陽暉花爭先近三台坐
春敢輕隨一片飛肯為孤妍回鐵石那憂餘賞間葑菲

韓退之以葑菲字押字韻

它年造物因依在領畧吾州勝槩歸

國色無媒出有時幾年幽戶鎖寒暉人從浴鳳池邊到
香入乘鸞扇底飛詩落雲牋傳藉藉花同錦隊想菲菲
更聞芍藥梢頭信亦待邀公挿帽歸

次韻梁跛道游苑氏園

晴日催花爛熳開九苞丹鳳引雛來春衫碧袖初單際
步障朱軒第二回許掾登仙全室伴謝公賭墅幾人陪
明年此樂知何處宣勸重持翡翠杯

淵明歸侶獨龐通坐客何人對乳融鴛燕不驚賢者樂
蕙蘭爭泛快哉風斑衣人在飄香外彩筆詩成徒步中

和語不工緣窘陋腐儒家卷草蒙戎

又作草

試院作

落葉飛飛度暗階月簾風慢若為懷
瑣窻未有歸消息
應冒蛛絲上雀釵

秋屋無人見草經忽驚太一杖
藜青抵應燒燭金鑿殿
未勝熏香石竹屏

春日館中即事五首

求友何人似谷鶯
羈游渾覺昧平生
閉門春事闕身薄
薜菊青青自可羹

暄寒稀復故人書
好在中山舊酒壚
端欲夢從三徑去
方牀投枕展龍鬚

故國悠悠雪外城
南山應復見高稜
向來梅柳春亭月
曾傍詩書夜按燈

元夕嬉遊遍海涯
上林風物弄年華
餘霽墮柳高低舞
香蠟封梅早晚花

熙熙人物藝金爐
歌舞升平六閨餘
輦路雪晴雲五色

史臣得記汗青書

直舍有書

時為大名簿

晚風收雨故森森
雀啁鴉驕未解陰
車馬不喧綠底事
道人宴坐即山林

林低野闊暝煙浮
似與幽人耳目謀
邂逅前身溧陽尉
欲將半俸博冥搜

右丞筆力到諸孫
詩語元勝畫不言
看取踈踈并寂寂
霜林煙搗欲黃昏

年來方寸湛如水
照見霜空無一塵
寫出禪家有眼句
不妨餘事作詩人

河西勘稻

攬鞍不覺醉中鄉
水陸紛紛利害長
便作河西勸農使
夢回應未熟黃梁

予行為魏倉監門
忽得前監倉官詩
人江南彭少逸詩
因次韻時彭以遺
火失官

聞道長安桂作薪
斗升誰乞向隅人
魏倉一炬非無為

似與寒枯慰晚春

廟堂鼎寶待鹽梅幕府千金政築臺孟子勸人蕭傳作
抱關不必是凡才

立春

城頭雲樹不藏鴉邂逅東風苦憶家憑仗主林神放手
為人匝地與開花

冰雪泠泠梅未芳欲羞蘭蕙召東皇蒲萄定自有春色
莫酌涼州孟伯郎

立春後作

東君珂珮響珊珊青馭多時下九關方信玉霄千萬里
春風猶未到人間

二月四日見小桃

香紅初破北州春深谷嫣然一笑新莫為餘寒嗟晚見
錦帷輕拜衛夫人

清明後一日出尋梨花先過城南資福僧舍修
竹森然即賦小詩感道愛竹之意客摘詩語病

予曰君自有竹何來此為因作梨花解嘲蓋予
故秋至魏未嘗見梨花盛時資福之句良率然
也晚飲全福抵花下披取巨枝立植間坐歡甚
徑醉乃知吾家子猷直與竹同迷耳亦為作詩
凡得三絕句

南陌無人地自偏僧房深鎖竹娟娟我來不為梨花雨
要看春風碧玉椽

霜紅雪白不同時春到騷人了未知素艷底應成偃蹇
練裙縞袂且追隨

花底杯盤藉翠茵折花圍坐當歌人謫仙自是開元客
玉帳熏香揖太真

北州故人見此句當知我猶能自振埃壚間然亦不應以音聲求我也

自述

九尺張公天下士喜君不為語清妍共看風骨尚書似
亦合曾中了未然

晏起

日過辰時猶在夢客來應笑也求名浮生自得長高枕

不向人間與命爭

答錢和父市易

爵懷不到酒邊開
欲就錢郎把茗杯
午枕無雲來楚觀
試書春夢屬多才

榮歸堂

華屋飄零銷夜臺
羊曇扶路肯重來
若為甌黍成奇禍
漫道人門似八裴

思家

睡翁憐我哭窮塗
千里親來不著書
未用中宵思白髮
盃光堪倚侍巾裾

見太行山

地上行人憐紫翠
羊腸九折有誰過
履危側足非吾敢
遠目看雲得更多

題北城馬鋪

始欲愁生愁未涯
清風白月客辭家
北城下馬無腸斷
淚墨斜斜塗晚鴉

渡黃河

河伯應窺豹管斑放船秋水不生瀾洋洋得濟非無命
題滿新詩趙魏間

黎陽道中

精神何足幾年支踈廣陶潛肯自遲又觸塵埃行道上
此時須記式微詩

少逸舊有詩云賓客次中消日月塵埃道上費精神陶潛踈廣有故事行

作江南歸去人

道中

靴紋綠淨漾林影紅芰鮮鮮得我愁却憶一云不似橫塘拜

新月折荷障笑木蘭舟

次韻李元量謝司門幹臣畫山水詩

江上家山晚翠濃畫癡端復覓詩窮李侯卷去亦亡賴
却對吳儂賦北風

題新畫八賢閣像

此地何從列姓名半因新國用輕刑江湖萬里知聞斷
圖畫相看眼自青

題普通院

閉戶野僧聞客避
護巢林鳥噪人飛
桃花落盡不須折
移得芭蕉相喚歸

重游全福留題羅弘信手種柏

鄴王神武冠軍中
夜半騎龍逐老翁
雷雨滿空飛不去
至今留鎖梵仙宮

漏月篩風一箭長
萬牛無力挽蒼蒼
直應刺著天公眼
却遣雷霆下取將

以魏花兩枝送梁才甫花不甚大作二詩解嘲

老去無心夢楚臺
行雲欲見仗誰媒
春風魏后尤驕蹇
只遣紅巾祥女來

求花聞道築金臺
國色懷春肯自媒
送入華堂應大笑
不令乳媪與俱來

厚之將試三衛有詩謝人送蒲萄為次韻

雲海龍鬚斷不殊
累累猶帶夜光珠
直應釀作春醅綠
傳與涼州亦丈夫

書扇

暈紅圍綠海棠春燕入西樓火令新綵索畫梁相對起
翩翩知有解飛人

西池羅幟盛嬉遊一水餘香晚自流別試春衫蟬翼薄
泥金新畫小龍舟

汪廷俊以詩送蒲笋次韻答三首

刺水森森露碧纖宰烹端為厭齏鹽政須留觀雙輪輓
未用來供一餉甜

入俎谿毛亦細纖調和終恐費梅鹽故應黃面瞿曇老
只說中邊蜜最甜

少陵惆悵渚蒲纖赤米何妨對白鹽枯槁自憐還自許
長齋猶有舌根甜

七夕日送泥兒與彭少逸代簡

此兒眉宇大儂好中但泥沙相合和造化作人日無數
憑君熟看幾爭多

保塞教授同年丁仲勤廣寄示和少逸十詩某

輒寄之更不理彭意無復次第

身入月光重示定諸香水海靜收瀾便令彼岸崎嶇到
已落初寮季孟間

僧中賞雋道林支儻有斯人見莫遲遠致高情歸許掾
更知孫綽最能詩

三徑從荒故嬾開熏爐齋杓伴秋來無心何地傳心要
不向人稱弟子裴

舊聞千歲遼東鶴塞上翩翩忽見過我有雲間化鳧鳥
追隨不用着人多

試吏初遊魏大名題輿深眷獨忘形山供爽氣焉知暑
日得高眠不廢經

僕初識今保塞別乘余侯於魏仲勤見僕詩於余處

左相司文十稔餘孝廉同歲異龍魚君應扈從甘泉仗
我自經營下澤車

仲勤與僕同年

煙檻風湍想勝遊新秋蓮芡及旁州先生對影招明月
政得加餐慰少留

眼看玉食禍吾鄉更卜幽居學仲長但遣有年供脫粟

白頭終不願膏梁

自嗤郎罷用心迂
飢坐呼兒課古書
只準高軒它日過
令吟交翠織華裾

康侯蚤日共周旋
筆勢翩翩兩鬪妍
乞與西山一九藥

坐令風翮更超然
康恭叔嘗預仲勤解送今錄
席下亦喜作僕字劄詩語

賦一首

竹林泉賦

王子遊臺山既賦焉
明日過竹林挹飛泉而樂之曰是
可與滔滔者同羣別為竹林泉賦

北山高寒水不濡
谷至花泔泓育王絕續
王子決竒觀於八表
縱遐武於千仞獨相羊
而永歎揖天潢之流潤
曾去此之幾何顧波瀾
其誰各客有從余者曰
夫子未覩竹林之水盍
往觀耶繚松麓之右界
面金字以直出振杖行
嘯山空響答虎豹遁莽
龍蛇驚蟄歛霽霧之褰
駭睨崩崖之却立瀑布
淙瀉林岫辟易雷破斧
而木碎紛其雜雨雹也
星掣旗而石墮燿其曳
芒角也風駘電

策蠟畧碎磕菴禱課謳鐘鼓奮作其羣帝馭氣而狩斯乎
縞裙練悅續綸襪積煙霏輿衝璣貝狼籍其列真踏月
而下嬉乎亂流赴溪竅石逶迤衝牙玉珮嘈雜爭馳被
草木之鮮滋蔚雲物之瑰竒蹇淹留而下上耿文露之
霑衣揚余袂而欲仙前洪喬與為期客曰自有天地即
有此泉道日月以俱邁夫子將安所旃客學詩乎詩曰
崧高維嶽峻極于天維嶽降神生甫及中山川之秀傑
豈無與於吾人故曰石而不泉則山不聲周勃霍光汾
陽臨淮未免於無文泉而不飛則聲不偉鄴侯平陽房
喬如晦不優於制禮嘗與客躡隣斗之高標臨掛壁之
跳波起萬累以獨遨俯一氣之同和立南榮而視余鬢
鬢余之謂何將不但夫金堂石室虹蜺光景之異丹砂
瑟瑟芝草葩卉之多者矣若乃一拳嶽岑羣潦鍾聚氣
偏產毒物恠藏蠱峭薄喧逐尚奚足顧彼謫仙飛流與
浪翁之水樂寧亦有是也哉客退然曰僕何足知之

欽定四庫全書

初寮集卷三

宋 王安中 撰

劄子

請行藉田禮劄子

臣準御史臺牒十月一日文德殿視朝輪當臣轉對者
臣伏覩陛下肇建明堂既訖嚴配乃以十月之吉首行
授歷頒常之禮三代墜典復見今日可謂甚盛之舉矣

臣幸以言語待罪禁林於禮文之事宜因有陳然臣愚
懵淺陋不足以仰窺聖學竊嘗攷之月令文蓋欽授民
時使時以作事者於農事為尤謹夫農天下之本也親
耕之禮事之本也王籍千畝天子三推先農之祀耒耜
之載種耜之獻見於經者其制甚詳昔我太宗肇行是
禮有司告畢猶以不終千畝為恨迄於仁祖惟稼穡是
好明道再籍弁冕舉趾進至十有二畦三公而下咸盡
墮焉神考稽古勅法正茲國之南位哲廟繼志述事榜
以思文之名恭惟累聖所以敷遺陛下者抑又大備時
令之頒此實先務比者迎真慶成臣獲扈清蹕侍事郊
次嘗寓天田壇壝榛蕪棟宇摧圯殆不足稱陛下重本
務農之意恭惟陛下天錫勇知自初臨御立經陳紀全
法三代之成聖治昭格天人同和風雨順序既屢有年
而縉紳之士郊甸之老猶欲拭目朱紘黛耜之觀者蓋
上以不忘列聖之德下欲元元之衆躋于富壽振古如
茲而臣愚欲望陛下申命有司參具典故斷自聖意順

時幸臨若乃仗衛之設資予之數赦宥之澤則願陛下約文以就質抑末以隆本必于今無所甚費則久遠可以時行損益之宜惟陛下所詔臣言狂瞽或有可采即乞特降處分討論取旨施行

再薦臺屬劄子

臣今早于崇政殿奉知本臺見關監察御史一員面蒙聖諭令如李回等以名聞伏見朝奉郎虞奕操守恬淡議論平正累經陛下任使多所聞見昨任監察御史緣陳彥文理會俞棗事令分析奕偶曾說及致俞棗得知坐此罷去士大夫公論皆謂其過甚微又經恩宥已嘗敘復知州差遣臣親承聖諭記其人物若蒙召還舊職寔足厭服衆論亦使今為臺屬者知聖恩寬大不以小過廢人則必皆有自立敢為之氣其於臺綱所補不細伏乞出自睿斷特賜處分取進止 小貼子 臣與奕即非親舊寔見其奉使河北及為臺屬人皆稱其清直無所阿附臣今早所論人材中奕又蒙陛下簡記所以

敢具奏聞

論臣寮奏乞推爵劄子

臣竊以慶賞之柄人主所專故書曰惟辟作福而周官太宰特以爵祿之事詔王至于馭富馭貴則惟王之聽而已以是知人臣之分勞固不可自言賞固不可先啟也臣伏觀陛下親灑翰申戒濫賞凡不以勞能定等其保明官吏并受賞者以違御筆論又因明堂鉅典告成推恩度越常格申戒官司毋得攀援陳請然則賞無輕重惟務當功朝廷守于上臺臣察于下聖慮一定其誰敢干臣尚願稍因近事申做一二此者陛下修祖宗以來太平盛事臨幸西地而雅飾池苑東西八作事材等官十員輒援例乞推賞恩特作監遂為取旨收接敷奏夫官以繕完為職若每事邀賞臣恐朝廷官爵有限不足以待之又中山府路帥臣河北路傳運使以深州濬濠先事奏請指期上功其役甫休干澤之書亟至深州數里之城耳所保奏者官二十九員使臣胥使三十二

人又詆大名五十餘里之隍池為不足比陛下灼見池苑因舊雅飾深州壕功不大並出宸斷更不推恩此誠足以杜僥倖之原破經營之計然既曰更不推恩是乃無足賞者則官吏攀援將作監取旨收接帥司漕臣先事奏請獨可無罔功之罰乎方今懷利之臣造端興事廣辟置以來賕請媮歲月以糜添給官資積累遽至顯列財用耗屈復擾齊民將懲此風盍自此始臣愚欲乞特降處分併賜行遣仍乞申戒有司自今非戰多軍勝不許申明收接陳乞恩賞事及凡營繕去處不許先事陳乞候功畢保奏其如顯有功效在所優賞即乞臨時出自聖裁降旨取索旌一勸百用尊主勢如此則下安分義時無濫恩操柄不移名器隨重裕民足用其本諸此惟陛下裁擇取進止

論妄興坑冶劄子

臣竊惟自昔神考之世凡山澤之利掌於常平仁民愛物之意具諸成憲陛下親政之初諸路坑冶惟舊係轉

運司錢本者自屬漕司外其餘告發檢踏烹煉費用等
並以常平條令從事官無冗員職有常守後因增廣鼓
鑄乃於河北河東京東西陝西權差措置坑冶官屬考
於初令固曰權差又曰候措置就緒即行減罷積歲于
此既無鼓鑄惟陝西河東出自御筆已併歸常平司若
河北京東西曾未及省而九路措置之使且復出矣河
北之鑿空擾下橫下橫及無辜既已考驗陛下沛然親
灑宸翰令具所費所得來上則官司遷延顧待蠹耗財
力之迹臣預知其無所逃于睿斷若夫京東西與九路
之弊獨可弗慮乎京東之近其無異于河北陝西河東
者固不待臣言而後知至於九路之事跨地遼遠體勢
甚重臣敢不為陛下詳言之項者朝廷遣徐禔往東南
措置銅事其後又益以寶貨裡復命於朝圖繪之數增
舊十倍乃奏請分委所部裡蓋不虞朝廷使之自行也
方裡為此數時峻文移禁錮人吏逼監司守令承認開
握江西洪州有嚴陽山場苗脉久不興發裡必欲有得

不復愛惜人力開握深入至命官何撫者暴路得疾以
斃最後裡遣屬官監守烹鍛僅得鎰銖州縣不得已承
認數十萬之額所謂鎰銖者人固疑其所自來而數十
兩之額人固疑州縣欲取之他也以此一事言之則九
路之數豈皆確然可信哉裡既不免自行計窮情得則
使之外別立說以規自免曰若或得希世珍異古之寶器
乞納書藝局坊陛下聖德撫運庶邦萬民惟正之供而
珍異古器之入自有司存如裡外臣豈其所職蓋欲挾
此以濟欺誕騷擾之計耳遠方異事初或可為弗空
其源害將甚大今訴訟之詞已有願以田沒官者矣矧
官屬吏額視發運司舟船人從券給公使之費又不特
如河北京東西而已也若夫東南舊來寶藏厲禁嚴密
鼓鑄錢貨又有近降御筆令兩司通融起辦而青碌之類
考於明堂第賞之書亦止逐路監司之效設有泛拋索
何必更裡輩侵官臣愚欲望睿慈加惠天下以今來體
究河北銅鑛御筆指揮下京東西及裡領九路後來興

修坑治處監司依應體究仍乞檢會陝西河東已降御筆參酌處分庶幾不失政事之體稍去冗官蠹耗之弊遠近幸甚取進止

賀皇后受冊禮畢劄子

臣某言云云天祚上聖申命碩德仰儷宸極共承宗廟典冊時舉海宇同慶恭惟皇帝陛下以天縱之聖該日就之學致孝述事既興寧考之法度告功報又備太平之禮樂日月風雨莫不順序草木鳥獸莫不遂性以今準古可謂盛時至于正心誠意之方齊世善俗之教躬所自厚人之難能日者長秋久虛柄臣屢請眷懷疇往却拒再三迫於天下之大公始訂國家之彛訓登崇邦媛用正坤儀若時宮壺之賢鍾慶儒學之胄著龜協吉禕翟有光上將追二帝三王內助之風下可化九州四海婦順之道臣蒙睿獎擢在近司職茲蕃宣敢自疎外深惟一人之慶民猶有賴矧此千載之遇臣實預榮欣忭之情倍萬倫等限官有守不得隨班稱賀瞻望闕庭

臣無任

大獲勝捷劄子

臣于今月今日準入內內侍省遞到御前金字牌子遞
角一道伏奉御筆手詔以臣遣發軍馬討蕩奚賊大獲
勝捷特賜獎諭臣即時望闕祇受訖臣竊惟陛下布昭
聖武恢復故疆巍巍成功輝燿今昔臣首膺睿簡付以
重寄而到任之日殘寇犯邊臣累奉成筭選將出師載
加討除連日大捷俘斬數萬邊隅肅清實聖德感格天
地助順鋒旌所旨迄用有成而臣任大責深勞不掩過
仰繫全度未賜誅斥已為僥倖而復親御翰墨曲示褒
嘉雲漢舒華龍鸞絢采不獨光生鄙室固已榮動親邦
誓當碎首捐軀以圖報効

辭免右丞劄子

臣今月二十七日准尚書省劄子奉御筆除臣尚書右
丞臣聞命震惶罔知所措竊惟陛下以神聖之資臨蒞
天下繼志述事創法立政孝思惟則先烈既昭而體道

致用鼓衆動化與天地妙且將納一世於希夷清靜之域則廟堂之上所與朝夕疇咨密勿廢載之臣非學足以知千古識足以明萬微恬情共足協贊熙運不在是列臣頑鈍窳薄蹇淺昧陋材智之下行身猶殆獨蒙陛下察之於隱約之中度越羣臣置諸嚴近北扉東閣三閔歲陰遭時之隆慶典系舉每獲以不腆之詞鋪張闕休睿獎所加未逮於戾而心慮枯索血氣殫耗方欲籲天請少就完養忽蒙簡注有此誤恩矧文昌網維政事所寄豈臣疇昔願志所及冥行冒處必至顛隳伏望聖慈保惠初終許從遷令因加考擇以授經濟之才庶於聖政有所裨益而犬馬之臣亦安愚分得寬隕越之憂不勝幸甚臣無任

辭免左臣劄子

臣恭覩御筆除臣尚書左丞聞命震惶不知所措竊以文昌二轄參輔大政雖聯事合治靡不相須而挈領振綱固自有序圖任之久原省既詳惟時底績之昭乃始

就陞厥位伏念臣材資甚陋學殖弗豐誤被眷知驟塵
柄用仰維聖治一遵元豐成憲小大僉志不命其承臣
所區區自効者特夙夜匪懈謹法守繩不怠而已稱報
微茂方竢黜幽重冒遷除必速顛隕伏望睿明旁燭終
始畀矜改命真才以協僉論豈惟寬愚臣超越之懼亦
足彰聖時授受之公臣無任

辭免迎授劄子

臣近具表辭免慶遠軍節度使恩命伏奉批答不允仍
斷來章者臣奮繇孤遠仰被異知發號大廷付之間寄
師旄齎鉞用侈軍容儒者之榮何以逾此惟是端闈近
節具著彛章自昔勲勞尚形遜避顧臣么陋敢冒茲寵
所有迎授伏望睿慈特賜寢罷

辭免垂拱殿賜宴劄子

臣伏奉制命除臣慶遠軍節度使考之彛典朝辭日賜
宴垂拱臣力小任重榮懼交并方當夙夜謀惟仰副委
寄燕犒異數何敢承克欲望睿慈特賜寢罷臣無任奉

卷三
拳之至

辭免檢校少師劄子

臣今月十八日準入內內侍省發來金字牌遞伏蒙聖恩賜臣御筆金花牋詔書已降指揮除臣檢校少師依前慶遠軍節度使充上清寶籙宮使兼侍讀者聞命兢兢不知所措念臣奮自書生誤膺寄任二年塞外莫補分毫既無赫赫疆理之勞獨謹容容柔附之策雖欲捐軀矢石圖報息私而天威下臨邊陲自肅罔功弗績久愧空殮已荷矜憐許其罷戍方投誠君父祈即便安百口徘徊一身羸病所期退伏詎敢僥踰忽拜雲章具形寵獎矧茲視秩實首三孤經幄邃嚴祠庭秘近皆非臣愚所可叨冒伏望睿慈追寢成命特降處分檢會臣前換授陞官除臣一員在外宮觀不特俯安於私分庶幾旁協於公言臣無任

謝陳乞換階官宮祠不允劄子

臣今月十三日準入內內侍省金字牌遞伏蒙聖恩賜

臣詔書以臣乞減罷換階官除外任宮觀所請宜不允
勿再有陳者冒貢忱誠威尊是瀆幸盼親翰息隱有加
承命震兢感餘涕實伏念臣頃緣末學被遇過優服在
禁林久矣文字為職業逮登政地初無議論及邊陲奉
辭來宣責專鎮撫方金人剽奮之後洎蕭幹猖獗之餘
軍務日艱了非本指勉所不習已跨再朞至於新附安
寧隣封馴弭坐蓐即叙盡出聖謨惟是年邁而神易疲
槁而病輒襲願先汰遣蓋迫衰羸仰荷慈憐曲垂訓諭
永言重費天地之造豈復敢愛犬馬之軀夙夜周旋茅
知竭盡初終保惠獨恃生成臣無任

辭免轉官回授第一劄子

臣伏蒙聖恩以哲宗皇帝寶訓成書特轉一官回授者
成編甫上信賞惟行曾是罔功敢忘懇避伏念臣頃從
隱約親被簡知初寘掖垣遂兼史事中繇憲府入直詞
禁猥叨申命寢閱歲時蓋無紉繹筆削之勤而有饕竊
稍食之媿暨蒙殊獎誤塵政地訓典奏御尚何關逮恭

惟陛下體道建極飭正百度一遵元豐成憲以裁抑浮
偽臣惟材下身脩四隣豈異疇曩空官弗績之微輒冒
寵渥通臣昧利累國是虞伏望聖慈深照惓誠許從寢
罷庶授受之際大公出自朝廷則觀聽之間羣下益孚
於德意臣無任

辭免回授第二劄子

臣近蒙聖恩以哲宗皇帝寶訓成書特轉一官回授尋
具劄子辭免伏奉詔書不允者懇辭誤賞蓋出忱誠淵
聽未回俞音尚閱揆義循分彌增踧踖伏念臣頃聯從
橐再秉史筆追逐羣雋之後無裨大典入塵政路行復
期歲先訓趣就何力之有乃以前日兼官之末並緣故
常需被恩渥夫名器之設所以為天下公而廉隅之崇
蓋當自朝廷始儻容虛受寔累政體敢殫危惓仰祈遷
令伏望睿明旁燭特賜矜從庶幾下得以逃罔功昧利
之嫌而上有以副責寔抑貪之意臣不勝

辭免回授第三劄子

臣兩具劄子辭免哲宗皇帝寶訓成書轉一官回授恩
例伏蒙聖慈再降詔書不允者勸賞之典必務當功義
或可辭敢避三瀆伏念臣頃在史局初無紬書之勤比
奏成篇了弗閱預貶恩下逮是則何名矧身在近司動
繫觀聽苟懷冒昧豈不累國仰祈天鑒俯照惓忱終賜
允從以安私分詞殫情迫期于得請臣無任 貼黃
臣伏覩不經進書官辭免回授恩例已有得旨依所乞
者與臣事體一同伏望聖慈務察特賜寢罷

轉太中大夫辭免第一劄子

臣恭覩御筆以生致渠魁東南救寧宰臣執政官各遷
官一等者狂寇陸梁上勤南顧興師命使兆自睿謀聖
武布昭下弗及議天地順助將士鼓勇盪平窠穴俘執
渠魁江山清夷四海溢喜臣猥以凡陋之質備數政路進
聞天語退誦宸翰竊闕神畧度越百王瑩爵之微靡所
自効敢復昧利僥冒慶賞仰祈淵鑒俯照惓誠特寢誤
恩俾安愚分臣無任

辭免轉官第二劄子

臣伏蒙聖慈以臣辭免遷官恩命特降詔書不允者賞必當功古有哉訓得非其分義在必辭竊以州邑情偷竒哀弗察致茲猖獗上軫淵衷兵威所臨則雷霆震薄詔恩所被則雨露涵濡盪定拊循兩無餘策若時經緯獨出神心臣日侍清光親聞聖略尚何所効不命其承乾清坤夷幸預偉觀敢緣邦慶更竊官勞矧舍爵策勲本為將帥之寵而循名實寔亘自朝廷之先仰覲睿慈特從遷令俾無虛授用穆公言臣無任

辭免大名帥劄子

臣伏睹制命除臣檢校太保建雄軍節度使大名尹大名府路安撫使加食邑實封者北門重地兵民事劇仰蒙寄任當誓捐糜臣不敢輒辭惟是寵遷視秩仍易將旄命數復隆懼非所稱伏念臣本從疎遠獲際休明入輔出藩每踰分量頃者往撫新邦超授節鉞洵茲罷戍累具控陳今守陪都密邇畿甸豈敢更有僥冒伏望睿

明旁燭俯諒忱誠特寢誤恩以允公議臣無任

謝除大資政再任大名府劄子

臣伏奉告命授臣資政殿大學士再任者懇辭弗獲但劇震惶伏念臣材薄智疎旁無攸助自初遭際以至今日皆陛下生成之賜隆天厚地曾未報塞然一遠宸極四易歲華守邊中山略殫夙夜蒙恩內徙甫此暮年此傳并門之除當陟太行之險山川暑雨何敢憚勞天日光明乃蒙委照亟收成命就加褒典雲霄在望桑梓非遙圖臣之居莫如此樂伏惟陛下保惠臣群無有內外憐臣去國之久察臣立朝之孤寐寤記存終始覆護留於便近借以寵光恩施君臣之間情逾父子之厚臣敢不益堅忠節上答聖知臣已具表稱謝去訖云云

待罪乞外任劄子

案此劄子共三首待罪一首乞外任二首因係一時相因

之事文義連屬原本併為一題今仍其舊

臣今月十二日准中書省刑房告報王某奉御筆別聽旨臣承命震灼即時出就城外僧寺聽候處分至當日

晚別無關到出門指揮不敢在城外止宿且還臣所居
次日準尚書省劄子奉御筆王某令供職伏念臣人微
罪大上累聖知初已席藁近郊仰俟誅戮緣無出門指
揮尚此家居聽命忽蒙親翰復使就職息深感極淚盡
血隨再念臣本自小官親蒙聖獎擢至嚴近無所稱効
陛下生成如天地教誨如父母而螻蟻之質冥然無知
自蹈不測之誅豈敢上冒恩私苟逃威罰矧玉堂非念
咎之地內務非使過之職設容濫處寔玷禁庭伏望聖
慈酌臣罪戾為正典刑以安臣子進退之分取進止
臣頃荷聖知擢參法徒出帥入侍五年于此越縣起部
進貳天官未速大呵仰戴全度而臣冒昧積久食浮貽
誚婦姑繼亡曾不累月悲傷耗氣疾病相尋若以恩容
不思鬼責尚茲黽勉必速顛隳兼臣親奉德音措畫右
選事務凡所奏請悉荷主張簿領網維畧已就緒伏望
聖慈察臣悃幅本不辭難特賜務憐除臣河北近鄉一
郡俾就安養承流宣化當既乃心粉骨捐軀不為無日

干冒宸嚴臣無任

臣頃從疎遠猥荷親擢御前召試俾專外制又蒙天獎改行吏房而臣自供職以來心氣頓耗首屢作蓋由才學荒淺不能應猝牽強思索所以至此竊自惟念遭遇特異大恩未報不敢求閑出入遞更願自臣始伏望聖慈除臣一州郡差遣責以吏事俾効尺寸儻因餘力稍就完養庶幾不至顛越上玷聖知進止

謝賜酒果等劄子

臣伏蒙聖恩特降御筆賜臣酒果雙角龍茶等臣已望闕祇受訖伏念臣寒鄉下士分甘藜藿致身崇顯積有空殫之愧撫師絕塞去國踰年鄙無遠謀以贊聖畧攻苦食淡當先士卒敢期淵眷典示寵綏寶翰焜煌好賜分郁上方珍御霑逮新邦帝所鈞天恍迷昔遇捧挹之餘感涕交并仰惟君父隆天厚地之恩樂與臣子均甘推食之意不忘孤外有此蕃錫謹當捐軀粉骨上報生成

謝賜茶合劄子

臣今月二十五日奉御筆金花箋詔書賜臣茶合一具
揀芽小龍茶二片臣已望闕祇受訖寶翰紆華溫言溢
獎錫之珍茗奩以精鏐下拜有光環營動色伏言臣頃
繇親擢出撫戎師踰歲留屯初無竒畫兵農丕叙蓋自
聖謨而渥澤便蕃匪頒狎至永言弗績冒昧已多敢謂
記憐申加好賜伏讀詔語俯矜暑暘俾以雨露之潤濯
此煙塵之餘承命分嘗清風生腋載懷曩日泛雪宣游
舌本流甘宛同昔味頓覺神明之還觀不知身在於邊
陲春遇之隆雖遠弗間捐糜頂踵莫報大恩

辭宣賜象簡對衣金帶鞍馬劄子

臣近者伏蒙聖慈特降中旨賜臣對衣金帶鞍馬今月
初七日正謝蒙恩稠疊無任威懼竊以驛駿効牽已叨
蕃錫服章出笥又沐殊榮拜寵稠重撫心震厲伏念臣
稟資駑怯賦分單寒組緝非工煖終慙於布帛馳驅弗
逮力幾盡於道塗雖有執贄為臣之忠曾微束帶立朝

之辨茅深憂於負乘敢再辱於匪頒伏惟皇帝陛下明
辨等差愛惜名器謹仲叔繁纓之明訓戒候人赤芾之
深譏盍分畀於三軍俾衆同於挾纊或旁周於羣牧使
政杜于駭輿收還疊至之誤息庶保易盈之愚分所有
今來賜臣對衣金帶鞍馬不敢祇受臣無任取進止月
七日三省同春旨
依例收受不許辭

奏傅墨卿被旨就觀韓君文人內傳劄子

今月初三日給事中臣傅墨卿至臣所居稱面奉聖旨
就觀韓君文人內傳臣某臣墨卿焚香盥手讀誦三過
臣某昨遇中元節召宿上清寶籙宮伏蒙宣予御筆韓
君文人內傳乃奉睿旨許臣寫錄是夕帝君將降祥光
見於神霄殿之上如雲非雲明爛奪目正類御畫三清
清微天帝殿上光相觀者呼舞連拜數所未覩而光之
所直乃在南斗六星之次實神霄都闕天機御省大人
之所治內傳首云壬辰開圖下傳祥光之應豈不昭然
若夫玉府西室之藏九天羽童之記吳都蔚陽之崇南

極敷華之論自太素渾淪梵氣融結三景直立萬化生
成悉具此書內諱一聞則凡骨可以超昇內字一職則
七祖可以獲庇况於親覩宸翰家有靈編陛下之所以
賜臣者至矣盡矣然而至文弗可輕漏臣既首蒙開示
乃躬自繕寫緹之什襲不敢示人今者臣墨卿承認來
觀聞者聳踴萬劫流布自今以始臣名載祕錄重叨榮
遇敢不剗心慕道為國捐軀仰報君師全度之萬一臣
不勝

謝賜玉嬰神變經劄子

臣伏蒙聖慈賜臣高上玉清神霄真王說太一保胎玉
嬰神變妙經一部者臣齋心滌慮入靖焚香誦讀累日
心目怡悅竊以三華隱道元始王文赤明開圖猶祕於
瓊臺金闕之上壬戌應運乃出於宛利契賢之界法流
虛觀欲問不能豈臣凡愚可闕髣髴恭惟陛下孕真梵
極合妙太初絜維道樞流布慈寶頃在開先之劫光乘
南極位登長生界矜羣迷示現神化乃託質大明之體

降宅寶蓮之坐承玉清之正統應上帝之元嗣自生神
受氣入胎誕形以至開府於五萬五千五百萬天地
之上總治神霄之政下應中元福境中國神州帝王之
位建立大教極度羣生真源浩渺離彼籌量爰於廣愛
大山百曲寶至蒼龍之居晨華之臺虹映海慈之殿檀
林丹光之館閭闕玉京之岫朱陽飛景之宇眉睫指端
如意寶履之間出無量大光明為九華安妃太極真人
左元先伯等天真仙衆演說神氣生道上妙之義起從
大空變化安立天地凝煉飛分應請萬國太一行神布
象却邪合嬰之元玉嬰降生升度朝元應號之序六十
會中諸天祕諱萬聖密語大乘奧旨罔不開露是宜九
帝助生五老錫符天花三獻神芝六生二十四種之色
七十二種之雲晃耀寶圖映照神璽受天人君師之任
延億萬運歷之數然而上至九品聖人下至九地無窮
世界之衆均受道氣形體保神各有儀則而苦昧久矣
隨空有色住五者之見耳目鼻口身意六者之識搶攘

展轉日遠真元豈惟不知道神生氣之本而神不足御
氣氣不足養心因業流浪無所終極甚者淪於酆城羅
山鳴谷泉曲之苦不知出離此陛下所以請命玉帝來
應昌會興立神霄大教而太一保胎玉嬰神變之經因
以下傳於人世走骨之徒臣雖識品塵陋竊謂玉經降
世凡有目有趾之類皆欣嚮悟入道力之所埏填真風
之所鼓舞八紘靜謐萬物遂茂元元之衆日用不知咸
躋於仁壽之域上帝申命百神受記產祥降嘏以佑聖
躬俾為者成欲者得與天地為常與日月參光本支蕃
昌子孫千億永膺多福自今其始臣名登真錄位忝近
班密受至文闔宗幸遇敢不矢心自誓歸慕希夷惟孝
惟忠圖報道蔭瞻仰宸極臣無任

奏狀

辭免中書舍人奏狀

右臣準東上閣門告報已降告命除臣試中書舍人者
聞命震惶罔知所措竊以代言西掖職峻地清每難潤

色之才必極儒學之選臣性資甚樸文氣弗高昨蒙聖
知試以書命擢貳秘府曾未閱月再紆宸翰遂寘從班
雖仰綠天獎之優虛名暴起而躡時髦之右私分難安
伏睿乞慈特賜追寢所有告命未敢祇受臣無任

辭免同修國史奏狀

右臣準尚書省劄子奉聖旨差臣兼同修國史者聞命
震驚罔知所措恭以哲宗皇帝聰明睿智齊聖廣淵興
孝思於親政之初紹考翼於更化之後聖德大業配諸
天地惟其述史之職宜極一時之選用揚偉績昭示萬
世臣奮身踈遠承學荒陋猥叨推擇俾預修纂雖耆俊
接武可資舊聞而寵任踰涯豈宜冒處仰祈天鑒俯諒
忱辭追寢誤思以安愚分所有勅命未敢祇受臣無任

辭免翰林學士奏狀

臣準尚書省劄子奉御筆除臣翰林學士者聞命遽惶
罔知所措竊以北門地秘學士職親儒者極榮朝廷高
選不辭而受理所未安伏念臣出自寒鄉驟蒙聖簡比

從詞掖擢長憲臺學淺智疎迄無稱効徒有罪戾積如
丘山憂畏之心殆成疾疹血氣頓索誦習益荒文字既
非所工思慮且復難殫深虞累國豈敢愛身伏望天慈
洞照誠懇追還成命改受辰髦別除臣一閑慢差遣若
依覆幘終獲存全指心誓天九殞圖報所有告命未敢
祇受臣無任

辭免翰林學士承旨奏狀

臣今日準東上閣門告報已降告命除臣翰林學士
承旨者聞命震惶罔知所措竊以北門東閣獨承密旨
職親地峻實冠儒臣惟時間出之才乃稱非常之選伏
念臣樸拙昧陋久於湮淪親被聖知躡置華近起之既
踣恩厚不訾數對清光更蒙天獎而大號令大封拜皆
特命當制臣之榮遇蓋無前比逡巡退避猶恐弗勝冒
昧超踰其必自殆伏望聖慈洞照危懇追寢成命止令
仍舊待罪詞禁庶安愚分未速顛躋所有告命臣未敢
祇受臣無任

辭免御史中丞奏狀

右臣准東上閤門告報已降誥命除臣御史中丞者聞命震惶罔知所措竊以中司之職紀綱所寄必得剛明果敢通達國體之臣使居此任則可以上尊主勢下肅官邪如臣者學淺智疎望輕力薄頃蒙親翰擢寘詞垣閱歲於茲日虞罪戾若復昧於量已冒處風憲之地豈特自速顛沛亦將有玷聖知所有告命未敢祇受臣無任

舉汪伯彥自代奏狀

準令諸侍從官授訖三日舉官一員自代者右臣伏觀具官汪伯彥積學之富夙有師承屬文之工蔚多華藻行能兼備流輩所推舉以代臣實允公議謹錄奏聞伏候勅旨

舉何臬自代奏狀

準令諸侍從官授訖三日舉官一員自代者臣伏觀具位何臬學問醇深識量高遠端靖之操士論所推舉以

代臣實允公議

舉權邦彥自代奏狀

準令節文諸侍從官授訖三日舉官一員自代者右臣
伏覩承議郎提舉永興軍路學事權邦彥雋傑之譽學
校所推瞻縵之文朝廷可用識慮高遠趣尚正純舉以
代臣實允公議

舉顏岐自代奏狀

準令諸侍從官授訖三日舉官一員自代者右臣伏覩
朝請郎提舉杭州洞霄宮顏岐識度曠夷學問淵博志
尚操領不減古人議論文章摘其餘事若使雍容近列
可以激勸士風臣寔不如今舉自代謹錄奏聞伏候勅
旨

論修北嶽廟奏狀

臣竊以北嶽常山分野在趙形勢雄壯鎮壓朔陲昔趙
簡子藏寶符於此山之上而襄子知其下臨代代可取
天胙聖運有自來矣恭惟祖宗肇造之迹實在保塞去

山甚邇王氣是資陛下比詔帥臣繕治嶽祠庶工子來
百神順助然頽圯積歲理難因舊經營欲速慮成簡樸
伏望睿慈申命攸司審視興作增廣規制必令臺門樓
觀繚垣埤垸有同岱宗廟貌之盛慶成之日儻或親灑
神翰大書扁榜以發山嶽之勝以隆國家之福則神人
幸甚萬世幸甚取進止

中書樞密到狀

索韃右屬臨疆場以居先寒暑載離問門墻而何潤卓
爾甚高山之仰悠然極歸路之長欣承顏之在辰幸委
心之有地方朱明之謹候宜盛福之鼎來恭惟某官稟
臯夔之姿輔唐虞之世奮庸能熙於帝載方懋格天之
勛非道不陳於王前遂臻尊主之烈某夙蒙教載猥在
知憐冒九死以乘邊曾乏拊綏之效寬百謫而滿成寔
繫庇賴之私方蒙犯於風埃行瞻望于鳥履尚祈衛養
垂副傾翹

謝賜御製酒樽詩表狀

臣伏蒙聖恩以臣近進神霄降聖酒尊詩特賜御筆聖製詩并序俯同元韻者天親有德誕開挹注之祥帝庸作歌申錫時幾之勅先生部室感極危衷恭惟皇帝陛下接統三皇應元九會位履以剛中正體乾以純粹精和同則無間於天人乃聖而不可知者昭回則為章於雲漢蓋煥乎其有文焉茲者薦藥殿之嬰香下琳霄之景馭其慕不改但餘元放之諸鑪所飲幾何寧止蒸經之百石撰緣寵睭獲與偉觀仍因上達之蕪音曲示俯同之寶製天地之有大巧雖莫得以名言日月之照容光遂益明於趨嚮臣敢不奉為大訓守以闔宗神動天隨誓永依於妙道雷聲龍見願更紀於真游臣無任

謝賜御詩狀

臣伏蒙聖慈賜臣聖製御筆送行詩一首者師出以律方從遣戍之勤帝庸作歌更示寵行之渥轅門拜賦成旆生光中謝竊以周有采薇之詩因命率以衛中國漢著大風之詠期得士以守四方聿觀汗簡之傳未若宸

卷三
章之麗重紆寶思垂賁羈蹤此蓋伏遇皇帝陛下躬煥
堯文聖兼湯勇俯勵封疆之守肆頌雲漢之篇臣敢不
恭體至懷仰遵成美劬舉陶之賡載雖愧非才繼召虎
之來宣敢忘竭節臣無任

謝喜雪御筵奏狀

上天同雲甫集飛靈之瑞君子有酒肆頌湛露之恩恭
惟皇帝陛下道妙範圍功參化育無遠弗届式從和氣
之游將受厥明嗣有豐年之報溥霑嘉應載浹歡聲臣
等無助燮調共叨燕衍徒負屬饜之愧莫知稱効之方
芻記 嘉雪應期慶均下土需雲賜宴息速邇臣恭
惟皇帝陛下政叙九疇化通一氣天不愛道方貽率育
之休冬無愆陽乃協屢豐之兆臣共承優渥實預榮懷
敢殫歸美之誠仰報示慈之意

欽定四庫全書

初寮集卷四

宋 王安中 撰

表

謝除中書舍人表

臣某言秘府高華方蒙親擢掖垣清切亟荷超除初雖
罄於忱辭終莫聞於俞旨具膺寵獎彌劇震惶竊以自
昔言語侍從之臣寔典號令文章之任德施威制雖難
名萬化之神墨妙筆精亦足聳四方之聽苟選掄之或

金定四庫全書 卷四
誤知稱愜之為難中謝伏念臣用志甚迂負能弗腆長
而無述幾驚過隙之駒冗不見治坐跂垂天之翼昨由
宮學進陟道山稍窺未見之書遽有非常之遇自天承
詔給札試言顧慚翫散之詞趣就須臾之頃謂塵燕覽
必觸天顏叨再命於九重每紆宸翰閱兩遷於一月遂
陟禁塗推外制以不試而用為優而故事或偶承其乏
則免孰如臣者考自帝前恩專出於簡知榮殆無於倫
比比蓋伏遇皇帝陛下堯文既煥湯德又新道兼於天
有雷風之鼓舞言惟作命同雲漢之昭回尚廣搜揚靡
遺疎遠厚龍光於草芥極歆豔於搢紳臣敢不深認生
成永思報效匪躬之故素已愿於輸忠不命其承益當
堅於報上臣無任

謝除御史中丞表

臣某言代言西掖初乏能稱執法南臺更叨睿選始趣
令於亟拜終莫許於牢辭祇荷寵榮徒深震慄竊以朝
綱所寄昔固嘆於難才士氣既卑久弗勝於流俗厯考

古人之行義但專一意以尊君且將通達壅蔽盡下情
蓋以剔抉幽隱為細事山林伏猛藜藿亦以森然金石
無心雷震必為霽止故下則身無養交充位之誚而上
則君有虛已受言之光申謝伏念臣用志甚迂逢辰特
幸試之潤色實非東里之才率爾論思是乃北方之學
敢圖簡記忽有超除此蓋伏遇皇帝陛下以道觀能用
人惟已知臣好直或由於好學謂臣愚忠猶愈於詐忠
擢居風憲之司俾效芻蕘之智臣敢不仰思眷獎俯激
懦庸傾瀝肺肝儻有萬分之補捐糜頂踵不難九死之
從臣無任

謝除翰林學士承旨并宣召表

臣今月十日武翼大夫充學士院待詔馬清臣至臣所
君奉宣聖旨召臣入院充學士承旨冠搗文之禁直已
誤明揚紆將命之使華更叨趣召紳綏改觀頂踵知歸
中謝竊以潤色大猷素極儒臣之選奉承密旨實專人
傑之求宋興百六十年於茲壁誌三十三人而已宮蓮

跋燭至空對於七春仙嶺浮鼈或稍遷於一紀顧如名
輩應遴此除矧金鼎玉鉉之元臣與鳳閣鸞臺之近弼
異時東閣接武四賢雖才分之爾殊信詞林之增耀凡
推擇實係重輕念臣久矣空踈蕭然疲緩獨荷照臨
之逮見收隱約之中入處嚴扉甫踰朞歲震風凌雨仍
慚再造之私蟠地際天尤幸千齡之遇瓊籙面聞於要
訣琅函數授於秘經天動奎鉤俯答蕪訶之韻夜趨霄
極仰瞻颯馭之游况大號之肆敷多一時之特召三王
就第五相策勳定命錫符均釐率土合宮布政授節通
聯萬年天紀之復元六路師干之奏凱猥緣簡記得竭
鋪張對揚每近於清光慰藉屢形於褒語俾寬幽黜遂
冒寵陞此蓋伏遇皇帝陛下心鑑沖融道樞淵妙因任
原省內獨運於乾剛翕受敷施外靡煩於師錫載加顯
渥用燕羈臣惟聖學之州增復睿文之天縱第知刮膜
竊窺雲漢之昭回曾是嘔心曷效雷風之鼓舞所虞累
國豈敢愛身獨肩論報之思終蹈捐糜之節臣無任

謝除顯謨閣待制表

臣某言出董戎昭分宜宜允汰擢參法從恩俾薦留重
荷眷憐靡容懇避德猥隆於草芥心更慄於淵冰中謝伏
念臣學淺知疎才微力薄早預賢闕之善養遂塵英毅
之並游兩忘鵬鷗之飛一付鳶魚之察中繇際遇寢備
使令具孚淮海之單辭厯按河山之二部逮聖神之攬
政乃賜召還補省寺之闕員每蒙簡在顏始違於天咫
接驟渥於晝三會謀師於關南獨受方於朝右後來居
上一軍盡驚未輸橫草之勞遠逼及瓜之代仰煩親詔
曲諭至懷進職西清迄功北道惟先帝藏書之盛雲漢
昭回而高陽制閭之雄金湯險固適今冒昧深所叨踰
此蓋伏遇皇帝陛下平施度邦寵綏群辟原省因任乃
君師所以佑下民善貸曲成如天地之能裕萬物故雖
踈遠亦極褒榮臣謹當憑恃國靈申嚴疆政捐糜踵踵
遑暇卹於家為系積涓埃靡坐媮於年所臣無任

謝除翰林學士并宣召表

臣某言烏臺代賈初塵執法之班鼇禁陞華遽冒搗文
之選紆使駢而錫召哄里巷以縱觀祇荷寵榮惟知震
灼中謝伏念臣學專守已進昧干時窮年隱約之中畢
願棲遲之末支離其德蚤知洪世用之難追琢其章晚
或誤天光之被自蒙簡拔即獲對揚首瞻日月之清明
謂有河山之懸直飛風未遠欲隨鵬翼之高神化潛施
不覺鼠肝之大竊顧非常之遇漸隣可畏之塗典訓誥
者期年心已勞而氣索司紀綱者三月力不逮而神疲
矧茲內務之繁蓋極儒臣之盛不辭而受方虞有識多
士之譏自恕以君殆匪每慕古人之意獨厚生成之賜
重慚因任之言此蓋伏遇皇帝陛下兼愛以臨百工虛
懷而觀衆智裁者傾者各從物性之宜鼓之舞之並入
天機之運乃重眷於單危之際俾收跡於嚴近之游仰
鴻造之不貲捐微生而莫報試之一再已知翰墨之無
竒惠以初終或覲田廬之可遂臣無任

辭免右丞表

臣某言登翊萬幾宜難厥付疇咨一德乃克有承俯惟
管蒯之求進有淵冰之懼敢陳悃幅存瀆威尊中謝伏
念臣學窺管而不足以見道之全知挈餅而不足以適
時之用獨荷聖神之親擢獲依日月之末光越寘複門
專承基命竭蕪辭之馘馘何裨鼓舞之功師零訓之丁
寧粗識鋪張之體徒以思慮耗於雕鐫之窘氣志索於
歲月之侵方期力丐於便安固已心甘於頑鈍倍費晦
蒙之惠驟紆綱轄之圖置水而芥為之舟靡堪大受未
牧而牂生於奧茲或非祥伏望皇帝陛下聽察以堯之
聰明用捨以周之陟降量才度德曲昭孤陋之難安詢
事考言更候僉諧之所與追還成命改畀上賢豈惟寬
誤國之憂兼弗累知人之哲絕坐難乎裴李非素願之
敢知稽首遜於夔龍庶俞音之可必臣無任

謝除右丞表

臣某言伏奉告命特授臣尚書右丞兼充神霄玉清萬
壽宮副使尋具陳免蒙降批答不允仍斷來章者代言

東閣已叨密命之承貳政中臺更誤近司之選控忱辭
而雖切被訓旨以加隆祇荷寵榮采增震悸中謝竊以
文昌釐厥庶務委綱轄於二丞元首輔以四隣如股肱
之一體用人當否繫國重輕上焉得原省因任之至推
則朝廷正而百官正下焉有同寅協恭之誠意則衆賢
和而萬物和矧遇聖神之興具昭功化之敏以繼前人
之志則所受休畢以善一世之俗則咸克勸忱若室既
堂我則肯構如材已斲爾其塗丹載觀政事之惟醇固
謝智謀而不用必慎厥與以俟知微知彰之賢俾率有
陳庶迪惟幾惟康之助伏念臣器居近用學昧大方晚
出寒鄉無先容之一介獨超俊軌閱再閏而六遷粵從
晝接之初已形柄用之意容其戇直以振兩河之氣稱
其文彩以為二禁之華琳闕群趨偕弼臣而賜篆鼇峯
夜入紆宸藻以垂訶護持尤費於大恩長養用成於今
日擢參國論蔽自聖心人實後來寧免積薪之議政多
末學深虞製錦之傷此蓋伏遇皇帝陛下體乾以純粹

精位履以剛中正欲一日二日之萬幾無曠永綏攸暨
之民合六德九德而百工惟時胥樂思皇之士既延登
於人傑共欽亮於天工兼收孤子之蹤將試贊襄之效
臣敢不抑思殊眷俯竭愚忠雖久待清光信其臣之莫及
而日聞獨斷蓋惟道之自從顧已哲於捐軀當弗渝於
報上臨下有赫實聞斯言臣無任

辭免左丞表

臣某言伏蒙聖慈除臣尚書左丞尋具劄子辭免恩命
特降詔書不允者贊襄無補茂聞已試之功圖任有加
誤玷頽虛之位爰滙囊封之懇載紆詔檢之華輒罄終
辭覲回定命中謝伏念臣智不周於庶務學未造於大
原猥緣際遇之殊寔被獎知之渥越登四近坐閱再期
德愈盛而日新顧何施於燭火任已重而道遠徒自窘
於搶榆方需幽黜之嚴敢冒次遷之寵舉直錯枉而選
於衆必得股肱之良陳力就列而止不能是惟犬馬之
願伏望皇帝陛下睿明俯照淵度并容允茲遷令之祈

欽定四庫全書
卷四
寬乃妨賢之慮終始慎厥與式昭庭陟之公左右惟其人務俾師虞之穆臣無任

謝除左丞表

臣某言伏奉告命特授臣守尚書左丞加食邑四百戶食實封一百戶尋具陳免蒙降批答不允仍斷來章者中詔頒朝載預疇咨之列左網虛位肆叨叙進之榮雖游達於邈函訖莫回於渙綍祇膺眷渥架積震惶中謝竊以天地辨位而君臣之義明帝王執要而政事之經立蓋本在上而末在下故臣必致詳惟統有宗而會有元則事皆隨舉矧冠疑丞之任實顯管轄之司處乎道揆法守之間諉以謨明弼諧之重倘非試可不以次遷伏念臣晚出寒鄉初無他技一官効智幾遂陸沉九牧知名悉緣天獎寘彼雲霄之廖廊振於風雨之震搖粵繇二禁之嚴進翊萬幾之密若時聖治丕紹燕謀飭寢紊之規則念每見於羹墻守既成之憲則堅弗渝於金石循名責實官無冗濫之員理財正辭國有經常之用凡

曰儀型之典端如卜筮之孚觀聖王於其燦然固已邁
鳧鷖假樂之盛在賢人識其大者幸復見貞觀開元之
隆依光坐閔於再暮撫事猶懷於昔論魯是奉承之末
必知稱塞之難江漢濯之寧復潢汙之尚日月出矣詎
須螢爝之持獨負愧於空餐久分從於幽默仰繫全度
更冒褒陞廊廟同時半用河山之士股肱在列偕來翰
墨之林此蓋伏遇皇帝陛下秉執道樞懋昭智燭翕受
敷施以就衆德因任原省以協至公於萬期年式永孝
思之祐曰三有俊共釐帝命之休俾參脩於機衡迺兼
容於管蒯臣敢不恪遵明訓圖報大恩職思其憂退益
勤於載采言可底績進弗替於輸忠降監在茲周旋以
是臣無任

帥燕到任表

臣某言近奉御筆令疾速之任於七月六日治事訖師
干護塞俾當涿鹿之衝儒服宣風兼鎮盧龍之舊問諸
故俗撫以寬條中謝伏念臣承學未優負能尤薄煨塵

弗耀初敢急於人門天日所昭晚乃參於世用自陪國
論屢閱歲陰西被東漸莫贊敷文之治南征北代何裨
經武之圖身雖備數於廊廟之臣上亦不責以軍旅之
事屬新疆之載拓須近輔以來臨委後務於會元按前
世平淮之實納新年之餘慶遵本朝下蜀之規猥承遣
戎之嚴兼冒授方之渥臨門過節仍蕃郊宴之儀馳驛
賜詩并侈鄉隣之寵赴屯於外請汰輒留逮逾六月之
行既命十連之率飛芻輓粟方遠畧之是資緩帶輕裘
顧諸生之安用第憑廟算式遏邊虞此蓋伏遇皇帝陛
下駿惠先猷翊揚獨智雷聲龍見大神震曜之神地闢
天開包有幅員之廣因加試可就董戎昭臣敢不祇奉
聖謨勤宣德澤無遠弗届願聞去殺之期咸與惟新亟
迪變表之効

辭免大名師表

臣某言伏奉制命除臣大名尹大名府路安撫使尋具
辭免檢校太保建雄軍節度使復蒙聖慈特降詔書不

欽定四庫全書 卷四
允者遠戍踐更真祠屏處復畀兵民之寄已誤觀能既
兼將師之榮敢饗加命洊書悃懇終冀矜從伏念臣晚
奮寒鄉親逢盛旦進聯綱轄每負愧於空餐出撫疆圻
第偷安於無事茲竊燕申之幸稍期疲曳之休載奉明
綸俾司留鑰官稱惟舊尚多昧利之慚恩渥增隆實重
踰涯之懼事非宜得義則可辭伏望皇帝陛下允輯師
言特回渙號使易盈之小器或免顛躋則未泯之餘生
尚能補報臣無任

謝知大名府表

臣某言中山重地已玷蕃宣全魏名都更叨居守仰服
訓詞之厚俯忘道路之勤祇見吏民敢違夙夜中謝伏
念臣本無他技粗守朴忠靡緣一介之先容親遇千齡
之嘉會稍蒙劇使即簡異知寢躋嚴近之塗終乏將明
之畧上辭機務規小已之便安改付邊藩出大君之特
達歲時坐閱罪戾是虞豐年間里之寧敢言已力治世
封疆之肅肇自聖謀豈圖不腆之才進冒非常之寵惟

北門之巨屏居四鎮之上游紫蓋黃旗接帝城之葱鬱
玉符金鑰乘輦路之深嚴若時撫馭之臣相望典刑之
老臣無何者今乃得之皇皇者華未改行臺之舊多多
益辦竊慚開幕之雄獨欣汶水之非遙實幸菟裘之可
卜此蓋伏遇皇帝陛下欽明旁燭睿知兼周善貸曲成
如天地之裕萬物原省因任作君師以佑下民謂臣來
朔部之類眷此去東州之適用捐寄委以示恩私臣敢
不竭節首公悉心體國冀網維之少就或 鼓之稀鳴
克壯其猷雖自強于蒲柳不能者止終有請于枌榆臣
無任

謝除大資再任知大名府表

臣某言明綸游降假舊服于陪京寵數兼崇進隆名于
秘殿忱辭雖罄淵 莫回內惟一已之叨榮外俾西河
之改觀感深夙夕媿溢心顏中謝伏念臣本乏異能偶
逢興運片言可績寔蒙特達之知小諒既孚驟玷弼諧
之任曩辭帷幄迭昇珪符朞年筦鑰之司未聞報政咫

尺冕旒之照每俟黜幽矐茲封畢萬之都夫豈借寇恂
之地矧遂嚴之東序列耆俊于累朝併荷誤息更遷近
職周邦徒喜于蕃實覲于甫申公綽何優為老或宜于
趙魏此蓋伏遇皇帝陛下迪知衆志因任庶工摩義漸
仁俗有乂安之化賜金增秩吏無數易之勤方求舊以
圖功亦念勞而申命臣敢不益堅忠節仰體聖心弭盜
訓兵少效撫綏之畧愛民重本庶臻安靜之風臣無任

謝除檢校少保表

臣某言伏奉告命除授臣檢校少保尋具辭免恭承御
筆手詔所請宜不允仍斷來章者中軍謀帥已叨漢代
之崇亞保視義載躡周廷之峻雖罄忱辭之確重紆寶
翰之華拜命增榮捫心益愧中謝伏念臣頃從末至誤
簡異知適叅法從之嚴遂秉政機之要第縻歲月無補
涓埃屬新邦來復於版圖需近輔往釐於疆理蔽由聖
選付以戎昭敷文德以格苗民既乏贊襄之効撫成師
而定燕國有慚臨遣之光當弭節以留屯屢抗章而丐

罷千里出塞俾遠戍之行五月渡瀘遂約輕齎之入
方布勞徠還定之政甫登康樂安平之書猥緣後務之
留亦玷司盟之賞焦頭爛額初何有於徒薪毀瓦畫墁
詎可言於食志雖曰湛息之溥逮實非小已之宜蒙偶
逋寇之干誅整偏師而薄伐朝晡再捷沙漠亦空倚李
祐以成功但守用降之策先曹叅而書最敢專發蹤之
勞會吉語之上聞攬遜章而親報具祇寵獎已即欽承
此蓋伏遇皇帝陛下內廣堯仁外昭湯勇神武不殺坐
開萬里之疆慶賜遂行特享四鄰之澤雖如羈遠亦在
記憐臣敢不益竭思維少圖報塞貳公弘化方隆乘障
之權五教敬敷庶迪移風之効

辭免檢校少師表

臣某言伏奉御筆手詔已降指揮除臣檢校少師依前
慶遠軍節度使充上清寶籙宮使兼侍讀尋具劄子辭
免伏蒙聖慈特降御筆金花牋詔書不允者冒貢忱辭
冀回渙號申頌親詔尚闕俞音終難誤寵之饗敢避天

威之瀆中謝伏念臣密緣惜學寢簡異知再歲乘邊第
守平平之策一身扶病迄無赫赫之名茲滿戍以言旋
分投閑而自弛遽承訓指超進班聯侍瓊籙之殊庭備
金華之舊列蓋前此優賢智之禮乃舉以休疆場之勞
儻昧利以偷安臣之罪也知罔功而懇避天必從之伏
望皇帝陛下智燭兼明道心博愛俯監由衷之請曲垂
遷令之私息此微生許畢柔榆之景自今餘日誓殫獻
畝之忠臣無任

謝除檢校少師表

臣某言伏奉制命除授臣檢校少師依前慶遠軍節度
使充上清寶籙宮使兼侍讀尋具陳免奉御筆批答依
已降親札手詔不許辭免仍不得再有陳請者撫新疆
而滿戍方遄收召之音渙大號以疏息更厚來歸之禮
每竭忱辭之貢祇勤親翰之紆亟拜寵光第懷震越中
謝伏念臣頃繇孤進寢簡異知牽課文詞猶曰平生之
學贊襄政事果無已試之能會謀帥於封圻遽受成於

惟幄侏儒扞虜不勝誤國之憂匹馬渡瀘敢作全軀之
計殊俗認勿疑之信懦夫規無事之安賴聖澤之滂流
格邊虞之耆定包虎皮而索^索弓矢種落一家挽天河以
洗甲兵農桑千里常武既歌於就緒出車爰賦於勤歸
分若子牟心常居於魏闕誰期定遠身復到於酒泉幸
休一障之乘仍趣九霄之覲陞眎班於在棘留偃節於
中都進讀邇英曾是論思之地侍祠寶籙乃嘗受度之
廷比奉昕朝載康玉色實畝實藉具昭經始之艱難靡
室靡家尚軫向來之落莫惟時茂渥疇克飲承此蓋伏
遇皇帝陛下妙道無方沈幾不測福威推辟獨操厲世
之權鼓舞盡神深得馭臣之術憐此軒墀之舊弛於塞
漠之衝惠以餘生錫之多祉臣敢不俯堅晚節仰報隆
私誦述詩書歸美一人之德精勤香火祝延萬壽之祺臣
無任

謝除檢校少傅表

臣某言伏奉告命除臣檢校少傅尋具劄子辭免準人

內內侍省發來御前金字牌遞恭承詔書所請宜不允者明廷誕告誤陞洪化之聯溫檢申頌未遂由衆之請敢期從欲游瀆蓋高中謝伏念臣舊自諸生親逢熙旦為功名而投筆多求蚤陋於班超資翰墨以入關始望殆踰於文本比自四隣之列出宣三路之威屬殘霄之干誅整偏師而奮伐身當幕北刀置鞞中聖謨洋洋沓授折衝之略虎臣矯矯共懷敵愾之忠援抱不待於五申破竹遂成於三捷設壇而拜韓信仰歸善將之功置酒而折隨何夫豈用儒之効幸封疆之載肅顧名器之敢饗茲預策勲獨憂昧利伏望陛下灼知以迪有俊明試而懋厥官特矜居寵之思姑底幹方之績許回渙號用協師虞臣無任

又謝除檢校少傅表

臣某言伏奉告命除臣檢校少傅尋具辭免恭承批荅不允仍斷來章者全師勝敵偶當一障之乘孚號揚廷許間三孤之列控忱詞而靡獲抵寵命以彌兢中謝伏

念臣策足諸生致身近弼聞俎豆未學軍旅之事游叨
稽古之榮聽鼓鼙則思將帥之臣忽誤謀元之選有行
新疆之闢惟艱後務之承方從輕騎以渡瀘遽報殘奚
之闕塞聖謨先定載虔問罪之辭王旅遄行其底侮亡
之罰時雨霈戎軒之捷迅霆摧賊壘之堅絕大幕以一
空肅昕朝而三賀無思不服時靡有爭民所欲而天必
從用迄駿功之定君之伐而臣何力亦饗信賞之加此
蓋伏遇皇帝陛下錫智表邦隆寬御衆誕敷文德坐恢
有指之疆肅將天威聿廣無前之績爰飭懋官之典肆
疇護塞之勤臣敢不益謹戎昭具遵猷子牟旅外寧忘
魏闕之心居定遠衰疲猶覲酒泉之身到臣無任

乞外任不允謝表

臣某言備負起部積媿空殮貳職銓曹重叨殊渥懇辭
弗獲恩指有加仰戴寵光彌增震惕中謝伏念臣材資
下腆識度非優初無飾已之智能粗有傳家之忠義逮
逢興運寔被異知擢自稠人游沐雲霄之澤久參法從

親承日月之光間繇顯聞之行亟預賜環之召式序在位庶克有為疇若予工終無可錄已寬息廢復玷超除惟文昌之貳知首天官之小宰力綿望淺事劇才難當總核之具嚴顧選掄之曷稱此蓋伏遇皇帝陛下道兼化育仁極生成徧覆包涵以作萬邦之又因任原省用臻百志之熙乃眷庸虛亦加保惠臣敢不竭誠狗節奉法守公夙夜所思固莫先於體國消埃可効竊自誓於捐軀臣無任

再乞外任不允謝表

臣某言忱誠上達覬有察於由中親翰俯頒顧弗容於補外仰懷寵遇彌積震惶中謝伏念臣初乏異能久尸榮祿既茂聞於稱効宜崇降於疾殃乃始籲天敢云擇地軒墀瀝懇已洊拜於溫言雲漢垂光更曲昭於至意此蓋伏遇皇帝陛下仁深覆露道脩生成謂衰難之可矜尚眷存之勿舍雙鳧乘鴈雖不計於江湖去馬來牛欲盡安於轅輅因加神筆以寵微軀臣敢不勉激懦

衷益堅晚節永言大訓豈特耀於雲仍竊誓此心固將捐於頂踵臣無任

謝乞外任詔書不允表

臣某言軒墀瀝懇初閱俞音雲漢垂光更煩親翰頒溫函而載渥控感臆以彌深中謝伏念臣本乏異能驟叨獎無實之名可愧不腆之學易窮矧茲內務之隆夫豈平生之望八埒日上眩金字之千言五閣雲深恍銀臺之三昧食既浮而多懼力弗給而先疲居惟累國之思進有籲天之請忱誠莫諒訓旨加隆此蓋伏遇皇帝陛下智燭兼明道樞善貸雙鳧乘鴈雖無益於江湖去馬來牛亦並安於轅輓乃眷嶽峙之跡重紆焜耀之私臣敢不欽命君師一心文字涓塵何有莫知稱報之方溝壑未填俱効捐糜之日臣無任

謝賜詔書不允表

臣某言近奏乞減罷換階官除外任宮觀準入內內侍省金字牌遞伏蒙聖恩賜臣御筆詔書所請宜不允勿

再
有陳請者忱詞上達游敢丐閑親翰中盼尚令代匱
曲煩褒勉彌劇凌兢中謝伏念臣奮跡竒艱遭時明盛
念終始典于學預闕聖作之淵微惟干戈省厥躬實昧
兵謀之飈忽茲領師屯之重載離歲歷之周轉喉幾雜
於殊音塞鼻生饜於異饌同來吏士既盡去而莫留僑
寓妻孥殆兩忘而稀問覩有食浮之畏衰難力任之堪
凡四上於節旄復三祈於祠館此物此志諒無藉於多
人肆筆成書猶俾安於厥服申加訓指尤認眷存此蓋
伏遇皇帝陛下聖度兼容仁心博愛謂久參於帷幄察
及初終雖邈在於封疆待如疇曩未從冗汰以示慈憐
臣敢不勉務獨勞每如始至尚寧幹止第憑外治之敷
何以家為更懋前修之畧臣任

謝乞宮祠不允賜詔表

臣某言今月一日上殿奏稟職事以病軀未安乞一在
外宮祠伏蒙聖慈特降詔書不允者彤墀賜對欣復望
於清光真館養痾獲縷陳於丹悃繼頒明詔尚閱俞音

中謝伏念臣稟性難竒被眷優渥由寵榮之滿溢致疾
疴之窺乘偶緣江左之姦氓稍復龔牛之化就易鎮東
之舊治空慙郭馬之迎比密拱於行朝勢尤難於卧理
抗章請覲容瞻咫尺之威告膝輸誠敢避再三之瀆豈
圖寬政未忍投閑此蓋伏遇皇帝陛下道廓蓋容息均
動植解衣推食每曲盡於下情補劓息黥尤垂憐於舊
物特紆清問深軫沉痾諭藥劑之塞溫辨醫工之良否
逮辭北闕仍叨蕃錫之光華既返東藩復拜溫言之煩
悉睿思若此小已何堪儻薄技之未窮豈殘軀之足惜
敵鋒屢挫而未聞於退聽敢忘海徼之虞民瘼望康而
尚窘於催科益圖邦本之固有以利物是為報君

謝降官表

臣某言蠢愚闇事合寘嚴科仁聖原情止從寬典危衷
載惕感涕交垂中謝伏念臣初乏異能上辜殊獎緣去
國五年之久兼乘邊百慮之餘老將至而易昏技已窮
而難強遂貽罪悔重累眷憐此蓋伏遇皇帝陛下愛等

父師恩均天地未忘簪履之舊特霽雷霆之威故弗加
誅第令降秩臣敢不仰思訓戒更務省循此玷未磨違
及謀身之念後圖可勉豈無補過之心臣無任

謝復官表

臣某言泉法流行稍追曠官之誚綸音褻拂更叨復秩
之思巧寢弗俞負慚罔措申謝伏念臣早緣誤簡嘗玷
近僚法出便民既預聞於曩昔奉身體國當自勉於今
茲豈識守分之常遂冒寵光之渥此蓋伏遇皇帝陛下
聖功日起睿澤時敷畀矜簪履之餘差錄絲毫之末特
加賞勸因示眷私臣敢不祇服訓詞益圖報效老之將
至願殫夙夜之勤知無不為用倡藩垣之治臣無任

謝落職官祠表

臣某言原情議罪敢追邦刑褫職示息滄頰天造危衷
載惕感涕交零中謝伏念臣初乏才稱誤叨帥任頃以
抱疴而自列繼蒙易地以遄行承市駿之書垂代歸者
三日申巧閑之懇乃獲命于半途積愆已多逮此盡見

雖重招於清議終弗寘於嚴誅此蓋伏遇皇帝陛下仁
政旁通道心善貸矜其黽勉既凋犬馬之年假以生全
俾終駒犢之養臣敢不粗完晚節深念前非病矣何堪
徒有熏修之願闕然自視莫知報効之期臣無任

謝差提舉崇福宮表

臣某言准 差提舉西京嵩山崇福宮者出司留鑰方
愧非宜改畀真祠更容自便思私有腆感媿惟深中謝
伏念臣奮跡寒微稟資遲鈍文供世用偶逢千載之休
身被國恩嘗列四鄰之近形骸槁於遠戍思慮耗於多
虞逮還進讀之聯屢有退閑之請顧未棲於田畝乃復
玷於藩垣自愧無堪欲辭弗敢交符三日適當備預之
初祇命九天遽解劇繁之責此蓋伏遇皇帝陛下道樞
善貸智燭兼明察其不能假以終惠俾託醇醲之化遂
藏疲曳之軀臣敢不仰體睿慈誓堅晚節餘生未泯粗
知忠盡之方九殞何難弗易險夷之守臣無任

寶章閣學士提舉西京嵩山崇福宮謝表

司戎避長誤陞學士之班刺郡乞閑遽領神仙之宅榮
屢辭而益峻思過重以難勝昧所從來言之曷既伏念
臣家雖弓冶身本泥塗積半生州縣之間僅能免過脫
萬死干戈之際本不求知薦揚方徹於冕旒解后適更
於琴瑟夤緣超躡度越尋常英蕩觀風再轉即專於帥
閫蓬萊寓直三遷徑入於甘泉逮茲訪落之初又枉起
家之召始偷安於武部旋改貳於儀曹史觀地嚴亦容
秉筆通英天近或使橫經已挺負乘之災尚昇絲綸之
寵非望峻登於常伯得歸尚假於隆名自寶章創閣以
來未嘗建長釋古鼎專城之寄始遂投閑惟嵩嶽之外
祠實洛師之重地念昔已叨於均佚及今更喜於重逢
禮在垂車當掛冠於帝里義同賜杖容竊食於鄉邦莫
名塊北之私未覺崦嵫之迫茲蓋伏遇皇帝陛下仁同
天覆恩與風行得博於濟衆之方示內恕及人之意俾
臣身雖遠外尚陪扈從之班知臣疾已沉綿更予支離
之粟遂使窮塗之士益增末路之光臣敢不堅節山林

思中畎畝力難報効但歌天保之詩職在禱祠請上華封之祝

謝魏王追封表

以下並代韓侍郎師美 案宋史政和五年二月追論至和嘉

祐定策功封韓琦為魏郡王

臣某言錄勲念徃曲垂宸翰之褒錫命勸忠追極王封之寵訓於永世著在信書達幽壤以知榮舉哀宗而增感中謝伏念先臣某昔居相位兩兩聖朝身期盡瘁於皇家天實開先於盛運初不自伐久而彌彰仰逢睿主

之繼承每荷淵衷之簡在臣頃叨乏使嘗對清光留聖問之雍容及私家之紀述逮登塵扈獲奉燕閒蒙宣訪之再三輒控聞於一二忽紆親札申降異恩雲漢為章俯賁九臬之隱山川啟宇峻超五等之崇此蓋伏遇皇帝陛下祇率前寧丕昭來孝潤色祖宗之業既底成功眷懷社稷之臣遂䟽渥澤臣敢不永思德意益謹義方小已何堪始莫知於報稱闔門相誓終共効於糜捐臣無任

謝韓魏王私錄宣付史館表

代

臣某言游彼溫言訪故家之私錄忽頌清詔增舊史之闕文思極漏泉感深闔族中謝伏念先臣奮由一介逮事三朝昭陵立子之初首開大策慈壽御簾之際獨靖羣疑繼遵末命於英皇仰奉丕圖於神考雖輔翊艱難之節天實聞之若彌縫委曲之言人無知者臣嗣逢興運獲廁從班頻瞻黼座之巍巍數奉玉音之秩秩謂矜能伐善固非丙吉之本心而紀事成書必有鄴侯之遺傳咨詢既逮冒昧以陳乙覽歎嘉既錫苞茅之寵信編論著益增汗簡之光此蓋伏遇皇帝陛下治假盈成功隆繼述履至尊而制六合無疆惟休褒有德以懷萬邦不顯亦世乃紆睿旨追錄前勞臣敢不勉激懦衷永思先訓忠於君父不忘所報

開德府謝上表

代韓師質

臣某言聯榮內閣已玷誤恩假守輔藩更分優寄密接神都之近首承上德之流祇戴寵光稱增震惕中謝伏

念臣負能既薄用志亦迂塵力詩粗襲先臣之學奮身
科第幸叅多士之躔間闕夙備于使令晚晚驟蒙于眷
渥追惟舊弼嘗輸社稷之榮訪逮嗣人超昇鄉閭之郡
比代還于北闕尋擢帥于南陽文陛延登玉音咨度誦
元豐之聖製審漳水之故阡親奉訓詞改隣邱壠俄授
符于全趙繼易地于澶淵三命茲共重叨屏翰再宿曰
信亟見吏民此蓋伏遇皇帝陛下躬秩大猷動遵先烈
念茲黎獻秉文之德對天燕及故家凡周之士亦世因
容微賤獲被生成臣敢不恪謹詔條布宣惠澤臨民弗
怠庶幾循吏之風報國是圖不愧功臣之世臣無任

大名帥謝表

臣某言伏奉制命除臣檢校太保建雄軍節度使大名
尹大名府路安撫使再具陳免蒙降批荅不允仍斷來
章者起從真館付以陪都峻加視秩之榮仍易齋旌之
重眷懷有腆感愧惟深中謝伏念臣奮跡寒微稟資遲
鈍文供世用偶逢千載之休身近天光既閱十年之久

欽定四庫全書 卷四
頃由政路出撫師千歲籥三周覺形骸之已槁都門再
入疑夢寐之初回務憐曲軫于土衷願語每康于玉色
惟是食浮之懼靡皇家請之安燕見所祈固及田廬之
卜隆私未愍尚叨藩翰之求已復預于謀元乃更霑于
進律此蓋伏遇皇帝陛下道樞獨運智燭兼明彊根本
以馭邊尤憐兩河之寄資典刑而用舊猥先一介之臣
因假龍光用昭體貌臣敢不仰祇訓指俯勵忠忱息既
厚而不貲莫知稱塞力雖愆而可勉何愛捐糜臣無任

陝漕謝上表

代席修撰貢

臣某言陞榮書殿將漕陝邠仰承訓告之嚴俯即封圻
之闕恩來望表感溢情涯中謝伏念臣識度非優材資
不腆偶身逢于盛旦借噐使于群工越自郎曹遂塵宰
屬轉輸晉部寔兼二敵之隣調餉朔陞幸迄三山之績
改茲劇任發自睿衷猥令魯衛之弟兄分總咸秦之兵
食入辭文陞親奉玉音層霄之照旁周零露之澤洽至
此蓋伏遇皇帝陛下欽明遠燭博大兼容善貸曲成體

天地而裕萬物原省因任作君師以佑下民是致踈微亦叨眷獎臣敢不堅忠許國竭節首公時和歲豐已腐關中之粟家給人足願流地上之錢臣無任

代張漕謝復官表

臣某言瀝懇自明幸逃疑罰推恩有叙冒進文階聞命若驚銘心知感中謝伏念臣材非挺特器本迂踈此復委於兩河已坐殫於五技日月逾邁雖強濟之茂聞兄弟孔懷偶尤違之弗預仰蒙原察重荷生成此蓋伏遇皇帝陛下明並日中仁同天大正名議罪昭其可免之情施德勸勞還以所增之秩臣敢不仰思訓戒俯罄忠勤當更誓於捐糜庶少成於報効臣無任

謝再復官表

代

臣某言慶澤時行幸獨宿咎明息還至叨復文階拜命命震惶撫躬感勵中謝伏念臣少聞義訓初乏才稱自膺劇使於累年粗守愚忠之一節仰承詔令雖夙夜之惟虔退攷事功靡絲毫之可錄類蒙遷叙重荷記憐此

蓋伏遇皇帝陛下聖度并包仁心溥博遵王之路公好
惡以無偏何天之休錫臣民而咸被故如小物亦玷鴻
私臣敢不深體生成益思罄竭誓以首公之志用伸報
國之勤臣無任

謝降官表

代曹
漕垣

臣某言智昧察姦固宜重責恩從降秩深荷至仁聞命
震驚撫躬戰慄中謝伏念臣材非挺特器本迂踈誤叨
識擢之殊寢備使令之末列城仰給蓋心計之已殫愚
俗輿訛乃風聞之不早既莫逃於吏議尚特屈於官刑
此蓋伏遇皇帝陛下聖度兼容道樞善貸施以生成之
惠薄其曠弛之誅始申戒於庶工實曲全於小物敢不
勉圖來効務補前愆庶憑夙夜之勤少答乾坤之造臣
無任

謝降官表

代沈漕
純誠

臣某言民訛不察是謂曠官邦法有常止令降秩仰蒙
矜貸俯極震惶中謝伏念臣學昧通方器非致遠徒有

逢辰之幸遂叨將漕之榮妄愚肆惑於封圻暫聞殆塗
於耳目獄辭自聽既已麗於刑章使指弗虔固難逃於
吏議未加嚴譴迺出大息此蓋伏遇皇帝陛下天覆地
容暘熙雲蔭雖循名而責實必以德而行仁曲軫睿衷
特從寬典臣敢不銘心思過悉力赴功冀少補於萬分
自湔於一節臣無任

謝降官表

代張漕閱

臣某言庸愚冒昧當真嚴科仁聖矜憐特從輕典危衷
載惕感涕交垂中謝伏念臣猥以凡材叨逢昌運一門
許國嗟華鄂之先凋半世莅官媿鈇刀之愈鈍逮茲將
漕曾未閱期初雖弗預於糴司比亦謬陳於稅議互煩
朝聽難逭邦刑既稍降於文階尚獲仍於舊服此蓋伏
遇皇帝陛下大明旁燭鴻覆兼容每觀過以原情必崇
寬而加恕故如踈遠終荷生成臣敢不念咎省愆首公
盡瘁明時何報第殫奔走之勤皦日所臨更誓捐糜之
効臣無任

謝降官表

時罷太
原帥

臣某言智昧脩官亟彰繆戾思從降秩實荷慈憐過大責輕感深涕實中謝伏念臣抱能不腆被遇非常八年瀛海之屯但縻廩食數月并門之寄未究網條疲軀尚阻於造朝真館幸容於將母明非所積幽黜難逃薄伸懲戒之科深認生全之賜此蓋伏遇皇帝陛下仁參覆幬明並照臨總覈無偏雖謹曠療之罰驅馳有素必推全度之私故使孤危獲蒙矜惻臣敢不仰思曩眷俯訟宿愆於爾筋骸已乏可陳之力循茲頂踵不忘欲報之忠臣無任

謝大觀改元赦表

臣某言號新歲建雲漢昭回恩首春行雷風鼓舞人胥抃蹈物亦欣榮中謝竊以正月始和於焉布德而施惠大觀在上所以藏用而顯仁惟好生之洽民心則設教而天下服恭惟皇帝陛下率循堯道稽用夏時孝悌感於神明休符沓至制作侔於造化曠典咸興得川珍嶽

貢而寶鼎成用聲律身度而大樂備授朔又朔乃推策以端朝開天之天因紀年而示象肆覃睿澤以格歡心罔不惟刑之恤哉茲謂有孚而顒若臣外叨分閫任實近民仰宣作解之慈共都觀生之慶

謝星文赦表

臣某言天人昭假曷惠小心雷雨汪洋誕敷大宥帝方視下氣可致祥中謝竊以星行乾端時見化國蓋靡常而偶至將因懼而寔隆頗有善言火為宋退苟無闕政豈唐憂有孚曠蕩之恩克弭照臨之象恭惟皇帝陛下德敷孝友躬服儉勤體道以懷百神愛民而及萬物更茲寅畏益邁往初寬如堯舜之性仁謙甚禹湯之罪已一蕪率土交感上穹臣託備邊藩預班聖澤冀速瞻於丕應庶仰副於精誠臣無任

謝八寶赦表

臣某言天臨路寢方祗受命之符春動綿區更冒好生之德臣民溢喜草木均榮中謝竊以神物之興人謀莫

建若地不愛其實則邦永孚于休恭惟皇帝陛下道妙
佑神功隆冠古稽文謨之肇造更秦嬴之舊傳三靈相
之八者備矣聖有作而物覩其命維新福既斂而時敷
與民更始至于平施薦紳之士厚敷支統之親盡弛闕
征載輕箠令撫荒夷之新附視剽俗以同仁是皆曠蕩
之恩益格和平之氣臣猥持從橐遠護塞垣側想天光
徒頌闕希之典仰承上德第虔寬大之書

謝八寶轉官表

臣某言珍符膺受渥澤流行預被寵遷寔慚冒處中謝
伏念臣抱能不腆蒙顧非常守在蕃宣既莫覩於天作
名聯扈徒又勿造于春朝緣盛福之時敷借庶工而序
進此蓋伏遇皇帝陛下道臻丕乂功集大成肇寶鎮以
奠邦明昭上帝揚王廷而孚號錫予善人肆均光榮橫
及疎遠不遺小物諒無雨露之偏莫報厚恩第効涓塵
之末臣無任

謝轉官表

臣某言官微善狀方懼謹訶恩逮積勞更遷品秩撫軀
知幸載賜逾深申謝伏念臣材寔迂踈學非通敏徒以
際逢之盛寔叨簡拔之私乘障何功但坐糜於廩稍賜
書甚渥仍留任於藩垣無積最之可稱固黜幽之是待
敢圖吏計俾冒朝榮此蓋伏遇皇帝陛下施德第功敦
仁覆物王者惟歲無為而庶績凝道兼于天不賜而羣
生遂大公所播小已均休臣敢不勉竭疲駑冀收塵路
永惟序進或故常以以為當然深認眷懷雖造次不忘
所報臣無任

謝賜御詩表

臣某言禁林夜直動鈴索以傳音宸筆春生捧雲章而
絢目顧羈臣之閣遇蓋近世之稀聞恭惟皇帝陛下儲
精養初體道至妙位乎天德夙申兆聖之符合于帝庭
下治契賢之世還淳源於三古開壽域於八荒爰因霄
館之休成式導颯輿之降格嬰香夕薦星弁羣趨猥緣
內務之縻嘗有蕪篇之奏乘天地之正而御六氣之辯

曾莫測於真游通神明之德而類萬物之情獨獲闕於
寶畫放勛之文有煥帝舜之歌惟幾昭回睿藻之舒蹈
籍先民之述臣雖遭甚盛詎稱所蒙持爝火而對太陽
之光可以息矣被短褐而懷垂棘之璧祇自懼焉永為
圭竇之榮觀更續玉堂之舊志臣無任

謝賜厯日表

臣某言觀象發春端朝頒朔詔音普至恩指交孚中謝
竊以乾元乘六龍以御天寧茲萬國閏月定四時而成
歲釐爾百工克厯載欽箕疇式叙恭惟皇帝陛下體貞
道紀參妙化原仰嗣無疆更格五辰之順外裒有截並
陶一氣之和推步肇新宣加竝被臣與叨委使敢息遵
承願騰高廩之謌以應清臺之課臣無任

又

臣某言厯日月而送迎贊天地之化育惟后欽若俾民
丕承中謝恭惟皇帝陛下聖智研幾道心觀妙既朔又
朔行神策於億年如煙非煙書卿雲之五色益謹授時

欽定四庫全書 卷四
之法用遵序事之文溫詔具孚庶邦咸則臣猥分優寄
實預寵綏願因太史之占以作農夫之慶臣無任

又

臣某言太史觀天辨陰陽寒暑之序六服承式識分至
啟閉之期肇自京師匪頒郡國霜露所暨正朔攸同中
謝恭惟皇帝陛下歷數在躬天地合德體元居正以昭
王度迎日推策以授民時課候清臺不特務存於故事
詔依月令固將增廣於德心臣敢不奉以周旋少圖報
効臣無任

又

臣某言迎日肇端聖惟欽若授時頒朔民以靈承拜
有加窺文何幸中謝竊以王者大乎一統神心締於萬
方乾元乘六龍御天所以首出庶物閏月定四時成歲
所以允釐百工曠然率土之間咸此序年之被恭惟皇
帝陛下妙參化育智及裁成冬無愆陽已慶同雲之瑞
天不愛道更瞻零露之祥載歌惟叙之功先衍無疆之

欽定四庫全書 卷四
歷臣猥當優寄實預寵瞻正月始和仰體發生之德大
觀在上益期富壽之風臣無任

謝賜詔書銀合茶藥表

臣某言輟宮闈之近御就賜明綸副舜劑之兼珍曲形
寵數中謝伏念臣賦材不腆被眷非常授節帥垣已愧
超除之峻進班從橐又煩親詔之留仰憑宸算之經營
俯幸邊隅之寧謐曾無威惠可實訓詞茂蕃錫以自榮
惕懦衷而若厲此蓋伏遇皇帝陛下同仁遐邇博愛臣
隣乃並綏以汪濊之恩故樂有此光華之使勸功息報
宜頂踵之必捐已疾除煩庶涓埃之可効臣無任

謝賜詔銀茶合表

臣某言金錯珍奩水蒼團壁斥附光華之使申加溫厚
之言仰戴慈憐俯深悻慄中謝伏念臣初聞祖訓親遇
聖知疇昔在庭弗為囊括中間避位實弛機張藩垣寬
閱歲之憂頂踵盡自天之賜敢謂記存之逮更隆錫予
之私此蓋伏遇皇帝陛下施德無疆念勞罔替生睠玉

御定四庫全書 卷四
闕之久戎馳分桑寧之新烹魯不鄙于麤官良未忘于
舊物恩頒有腆禮遇非常捧次光生認天題之濕處吸
餘神徃追風馭之冷然稍滌智昏益思忠報臣無任

謝入伏早下表

臣等今日伏蒙聖慈特降中使到院傳宣奉聖旨入
伏早下者暑令金藏曲軫至慈之念思言天降俾從風
退之私中謝伏念臣等猥以凡材對司內務鑿坡地祕
已霑殿閣之涼鈴索聲稀每幸文書之靜深惟榮遇實

愧空餐敢圖加惠之優更遂自公之逸此蓋伏遇皇帝
陛下道參化育治格平成養萬物而播清微之風運六
氣以順赫曦之紀迺下降寬之令特紆執熱之勤伏當
早歸尤謹偷安之戒日惟不足益懷盡瘁之忠臣無任
謝賜對衣金帶鞍馬等表

臣某言出襜裳于御府束以環金引逸足于天閑副之
繅轡寵光洊至震暢彌深中謝伏念臣學昧美身材難
致遠偶親逢于盛旦遂踐歷于華塗在矧之馬思無邪

既繫維之是就如子之衣安且吉魯蕃飾之已多敢緣
因任之求更冒匪頌之渥此蓋伏遇皇帝陛下如天覆
物以道馭臣願雖卑賤之軀亦假便蕃之數不稱其服
終無濡翼之功既閑且馳徒誦卷阿之義其如報効已
誓捐糜

又

臣伏念聖慈以臣入院特賜衣一對金帶一條并魚袋
金鍍銀鞍轡馬一匹者擢承密命方拜寵于昕朝跼聽
臚傳更加榮于好賜禮雖有舊眷則非常中謝伏念臣
本乏異能寔叨殊獎愧高華之弗稱知焜耀之已多從
容而不貳衣徒謹都人之尚蕃庶而用錫馬敢與晝接
之求獨緣任使之私復冒匪頌之渥此蓋伏遇皇帝陛
下恩被動植道馳人羣特優儒學之臣用廣文明之化
垂帶而厲固自視以匪紆叱馭曰驅當益鞭其不逮

又

臣某言在笥頒衣兼金賜帶引內閑之駿絕副寶較之

華鮮拜貺有加撫躬靡措中謝伏念臣外叨方任初乏
治稱進近職以洊留已塵渙渥裒多義而下逮載冒寵
章遠而有光獲以為幸此蓋伏遇皇帝陛下仁豐而博
物舊亦憐層霄之照旁周零露之澤狎至不稱其服曳
屣敢怠于再思既閑且馳矍鑠猶堪于一據永懷報効
竊誓捐糜

謝賜生日羊酒麪表

臣某言閭史書年茲劇劬勞之感養官致餼更叨優渥
之私焜耀有殊震惶靡措中謝伏念臣少知耆古長昧
嚮方偶膺宅俊之求亟踐疑丞之任陳謀每下徒招浮
食之譏曠日既多重識包荒之度敢圖隆眷俯記始生
矜其霜露之思憐以雲天之澤此蓋伏遇皇帝陛下寵
綏近列率顧庶常若時好賜之所加不以罔功而輒廢
洎親有祿嗟莫遂於素心教子以忠誓弗愆於慈訓臣
無任

又

臣某言伏蒙聖慈以臣生日特降詔書賜臣羊酒米麩者左弧六射方懷顧復之初細札十行式示匪頒之渥載惟焜耀彌切震惶中謝伏念臣跡本羈單學非通博授經摘句少獨費於母勤行已莅官長更煩於父誨誤叨殊獎驟列近司君親臨之幸灼知於小諒日月出矣愧絕跋於清光敢謂始生猥蒙垂記此蓋伏遇皇帝陛下仁光毓物禮備養賢賤其風木之思假以露蕭之澤祿焉弗泊尚奚事於家為軀也可捐固莫忘於國爾臣無任

謝賜器甲表

臣某言伏蒙聖慈特遣睿思殿供奉黃珣賜臣器甲儀物等師徒爰整當出車建旄之初儀物載頒兆彤弓旅矢之慶拜恩憂溢撫已心營中謝竊以南仲總戎美篔第鈎膺之飾吉甫承命絢織文鳥章之華惟雨露之恩契簡編之舊事特出上方之戎器大振中壘之軍容何龍盾虎鬣之足云蓋垂矢兌戈之不啻一時重任愧

卻毅詩書之敦萬目榮觀有秦仲車馬之好此蓋伏遇
皇帝陛下重華協帝下武繼文俯念舊邦塗炭之民盡
復中國耕蠶之地敷德以滌舊汙之俗謀帥以撫新造
之邦練日時之吉而立大將之旗森劔戟之衛而壯元
戎之隊臣敢不夙駕盡瘁挾纊均溫圖于疆于理之功
在既來既平之後仰遵睿筭唯求邊鄙之安遠震皇威
漸格干戈之戢臣無任

謝賜臘藥表

臣某言伏蒙聖恩賜臣御筆金花牋詔書臘晨風藥一
銀合者歲時軫念不忘遠戍之勤藥物如珍更假溫言
之寵觀瞻改色感愧裝懷中謝伏念臣本自羈單過膺
獎用旣以一身而許國敢辭九死以乘邊多病臬衰寢
覺形骸之槁窮冬急景乃知節令之新淒其雪席之霏
叨此雲章之錫丹砂玉札有來仙劑之良翠管銀罌猶
識恩光之舊此蓋伏遇皇帝陛下同仁中外誕保臣鄰
睠茲簪履之餘守在封疆之邈曲垂慰藉以示記存臣

欽定四庫全書
卷四
敢不仰體至懷俯堅素節欲圖來効但虞旅力之愆倘
弛餘年庶遂生經之衛誓捐糜于頂踵思稱塞于涓埃
臣無任

賀淵聖皇帝登寶位表

臣某言伏觀赦書皇帝陛下登寶位者皇天祐我下民
佑啓承乾之運聖人位茲大寶聿膺御歷之符神器有
歸邦基永固中賀恭惟皇帝陛下聰明日就睿哲生知
毓德儲闈早繫天人之望紹休帝祚益增社稷之昌仰
託照臨惟胥鼓舞雖同群目幸瞻日出之光第遠辰君莫
預衆星之拱臣無任

賀受八寶表

臣某言惟天申命乃聖成能即春大朝受國新寶函覆
所被呼舞攸同中賀竊以器不相沿文因久息形而上
者謂之道先得於斯神而明之存乎人夫然後作及其
成也又有相之恭惟皇帝陛下德業大成治收假溢考
舜工而制樂續禹緒而鑄金命適至於湯齊事悉臻於

欽定四庫全書
卷四
周備載更八紐示不賴於流傳永祚億年為無窮之保
用臣恭想大廷之拜寔均庶類以承休

賀立皇后表

肇正宮闈丕承宗祏天地相合神人以和中賀竊以媯
汭觀虞塗山啓夏姜來胥宇蓋亶父之由興如嗣徽音
乃文王之所聖內隆懿德仰屬熙朝恭惟皇帝陛下率
禮範民以身行道監于成憲欲治國齊其家弼我不基
既受命立厥配時惟茂典繹以庶言矧偕龍御之升更
協蟲飛之夢樂只君子永綏逮下之休至哉坤元共賴
承天之德臣厚叨睿眷慶倍羣情第謌彤史之光莫預
紫庭之賀臣無任

賀宣示御書明堂太室字并圖樣表

臣某等言神廷肇造親授翰以正名聖畫誕敷首揭圖
而底法仰承昭示咸預榮觀中賀竊以六經千載之傳
明堂為大四阿重屋之位太室居中道與世殊事隨時
異奉高汶上鄙漢祀之何稽東都乾元陋唐儀之弗典

惟王建國嚴父配天將專對於靈休乃肅開於寶構分
其五室度以九筵陰陽通八卦之方上下畫二儀之象
宸毫中運極雲漢之昭回繪事甫班見規摹之宏遠恭惟
皇帝陛下玩心昭曠凝命穆清天聰天明方輔惟馨之
德我將我享更隆伊嘏之恩用垂永世之光爰啓合宮
之議煌煌墨妙蓋將聖而多能奕奕翬飛寔自我而作古
臣共欣先覩竊後慶成榜以寧神當從仁皇而增美按
茲考室知非玉帶之能窺臣等無任

謝賜御書千字文表

臣某言伏蒙聖恩賜臣御書草聖千字文一軸者寶附
天運仰勤萬乘之尊蓬戶春生俯拜千言之寵紳綏改
觀都邑驩傳荷隆眷之有加闔衰宗而歸感中謝竊以
上古結繩而治誕先有作之文聖人肆筆成書默合自
然之妙絲河出負圖之兆暨神資雨粟之符篆籀之法
滋興真藁之源繼起粵若杜崔之所尚與夫張索之相
高雖窮千形百體之工未究四闢六通之道至神天縱

大巧生知成能參造化之初浙藝絕名言之表洞章簡
錄焜煌魁斗之威璇榜雲楣卓犖奎鉤之象至於雷擊
電奔之逸尤極龍騰鳳翥之奇書契以來帝王第一顧
如臣者敢有求哉比瞻法坐之光咨逮詞林之秘因垂
嘉獎欲遂寵綏退傳溫旨於複門快睹珍藏於同舍泚
金壺而霏潤爰下九天捧玉軸以舒華併茲一日共識
搦文之盛獨慚稽古之榮此蓋伏遇皇帝陛下覆冒庶
常并包衆甫顯諸仁而藏諸用鼓舞惟神得于手而應
於心昭回在天特假露蕭之澤俾安風蒂之棲爭醉墨
於御牀彼非其分冠寶章於家集孰得而踰臣報國無
堪誓心已確終幸里居之請晚惟宸翰之依談際遇於
鑿坡遠從耆舊託護持於恒嶽永燕雲來臣無任

進御書手詔碑本表

臣某言伏蒙聖恩賜臣御筆手詔以摹勒上石者中謝
竊以金聲玉振服聖訓之高明鳳翥龍蟠仰天章之煥
爛已謹緘滕之固更祈琬琰之傳河圖洛書邈前人之

制作皇墳帝典貽萬世之規模豈徒為臣子之榮抑以大華夷之觀謹馳墨本上進宸居冒瀆天威無任戰越之至

謝賜御書神符表

臣某言近因進對伏蒙聖恩許賜神符今月十七日中使奉傳聖旨賜臣御書大符一軸上有星斗象及勅文寶字者玉音咨逮嘗矜儼舍之卑雲篆傳觀特錫飛符之秘旄倪銘意崇厲翦形中謝竊以上帝佑民而作君聖人以道而蒞世有德司契其鬼不神鼓舞挈提自我四闢六通之化揮斥効召存諸三元八會之文故伏羲帝堯秉中皇之章而祝融高陽服太一之號金真玉璽赤舁黃書飛日景之光華乘星精之豁落並出始青浮黎之士丕昭火鈴神虎之威自非降九霄以應期孰可攝萬靈而肆筆昊天其子下民之王拂素流丹駭龍蛇之起陸結空布烝條山嶽之藏雲勅河則馮夷為之收波救旱則靈霍為之興雨豈但東妖而馘毒蓋多起死以

肉骸如臣何知被眷既渥尚以攸君之陋曲煩丕燾之
慈闢乾闔坤親灑洞章之妙歷箕旋斗用綏蒞室之寧
此蓋伏遇皇帝陛下御六氣之辯於無窮行萬物之上
而不慄精神所運變化乃成焜煌初出於毫端恍惚已
形於霄夢天威咫尺惟均奠枕之休神物護持無復嘯
梁之懼臣敢不闔宗齋戒畢命歸依善救人故無棄人
愧難酬於元造雖問道亦未聞道誓更迺於真風臣無
任

謝宣賜御筆書明堂等字表

臣某言正位凝命肇營嚴配之宮肆筆成書妙極昭回
之象仰蒙廷示俯遂管窺中謝恭惟皇帝陛下聖學研
幾孝心致至我將我享務隆伊嘏之恩天聰天明欲達
惟馨之德謂王者成萬化於一堂之上而聖人播五行
於四序之中考六經互見之文兼三代相因之制聽十
二之朔用即廣君度九尺之筵是興重屋黜東都乾元
之議鄙奉高汶上之規倅圖而有飛星出柳之占僞功

御定四庫全書 卷四
而有太木浮江之瑞乃親翰墨預定榜題雲物舒華奎
躔動彩鳳翹其羽體自騫翔龍游在霄勢尤夭矯蓋天
機之中運必造精微想帝監之下臨亦深悅喜臣逢辰
竊幸刮膜更榮永觀厥成俟休功於不日用宏茲賁垂
實訓於無疆臣無任

賀燕樂成表

臣某言天地同和不應文明之運君臣相悅肇新安樂
之音盛冠古初歡均遠邇中賀竊以笙鏞列于舜陛無
相奪倫管磬設于周庭既備乃奏永觀有作之聖茂對
非常之時間出異人贊紹堯之獨智前興神物告績禹
之成功用能參六籍之傳自然起一代之樂協于度數
燕及家邦恭惟皇帝陛下躬秩大猷動遵先烈四方其
訓禮已合於乾亨九叙惟歌德更崇於豫順比中聲之來
上即更坐以縱觀百獸率而鳳凰儀豈獨娛於羣后萬
物育而星辰理寔兼佑於吾民臣叨守近藩側聞慶事
清光在望空馳魏闕之心妙道難名敢賦咸池之頌臣

無任

大名奏教成親樂

臣某言和樂象成四達寰區之遠陪都享上一新旬月之間協氣網綸羣心愷悅中謝竊以道德出於聲文之妙教化行於燕饗之歡八音克諧則庶績熙五者不亂則萬邦乂時惟聖作寔與政通恭惟皇帝陛下孝奏神明智侔造化以日就月將之學致地平天成之功鋪張三靈之休跨越百世之盛身為度聲為律得以自然微為事角為民按之大備著於詔令頒逮藩垣潛滋動植之榮丕變耄倪之聽臣誤叨居守幸預承宣密隣首善之畿仰體統同之意尹人祗辟曾無補於泰辰易俗移風共竊謌於溥烈臣無任

賀流星出柳星表

臣某等言合宮經始隆聖制於雉門垂象飛光顯休符于鷄火神謀先定天意允昭中賀竊以自昔造邦但窺營室若時正位亦考極星因體國以辨方乃求端而從

事詎有非常之應見於有作之初惟流星出柳之占蓋明堂僦工之驗喜歸宗廟慶在睿躬恭惟皇帝陛下祇紹丕圖適追前烈濬發光明之學肇興嚴配之思以一日萬幾之餘稽五室九筵之數斷自獨智告于大廷文考在天將顧懷於達孝上帝有命肆申錫於嘉祥赫然貴使之輝相此重屋之建臣叨聯輔弼莫測感通永觀厥成預罄斯干之詠用宏茲賁益恢大壯之規臣等無任

賀火星避心星表

臣某等言火行有度循列舍以將經帝德所移越三星而亟過上天純佑率土交欣中賀竊以復見往來具垂於象緯疾遲留退爰示於機祥惟熒惑淳耀之精受太微司察之制當秋之後歷氏及房絕去忽高順動且速避心宿之上踰二百分出豫野之躔無十數夕不犯不寄俾熾俾昌恭惟皇帝陛下視遠惟明為國以禮道既光于四表治兼撫於五辰方申命以用休聿懷多福宜

觀文而察變無有後艱煌乎炎德之符燕及天王之位
仰照臨之不忒推壽考之無疆臣等初乏管窺幸瞻隆
晷火主聖運豈止景公徒舍之占心為明堂預識周家
嚴父之應臣等無任

賀日食不及分表

大觀元年十一月朔臣某言日行有常在數當食天意
所佑其光不虧凡預觀瞻舉同欣抃中賀竊以兩曜更
更照不分交會之期二經相推遂驗淺深之度比者仲
春之朔見於南斗之躔圓儀積厚而可占太史先天而
以告惟至神之助順垂景貺以照臨陰弗侵陽星能禦
侮明離增熾已遲午正之時協氣正騰不滿半疆之數
恭惟皇帝陛下道齊七政德撫五辰定鼎膺以象功崇
宗廟而致孝宜無疵慝永底和平矧二至相過而非災
實一人有慶而允賴臣造庭不果徒傾葵藿之心拭目
以觀願頌岡陵之福臣無任

賀日有戴承氣表

後德昭升上穹純佑大明以照瑞氣相輝瑩視所同歡
聲咸暨中賀竊以君道象日天占在人氣氲上騰蓋叶
同心之戴絢爛下映乃符丕命之承萬有千時二者並
見恭惟皇帝陛下中正履位文明應天粲然殊特之祥集
此光華之旦昔章聖岱宗檢玉抱戴効休今陛下路寢
受圭雲物薦祉紹膺景既丕顯成功臣職近宸嚴任叨
都會親遇豐亨之慶願賡時邁之謌臣無任

代周提舉作賀冬至朝會受圭表

臣某言陽氣潛萌天心允格肆臨路寢恭受珍符基祚
增隆華夷溢喜中賀竊以二帝三王之所作蓋傳上古
之書九州四海之既同有告成功之器茲為神物以俟
聖時恭惟皇帝陛下德備堯仁道兼禹智巍巍丕績茂
昭祖宗之烈光穆穆盛容欽承天地之大寶卜年有永
如日方升臣叨領使華阻趨朝綴竊慶非常之會但騰
惟叙之歌

又

臣某言迎長化國方乘陽復之亨展采路朝克受天元之瑞有生共慶振古未聞中謝竊以堯之為君欽明而蕩蕩禹之行水勤儉而孜孜故百工庶績之咸熙而六府三事之允治既鑄鼎以象物乃錫圭而告功五帝殊時萬世一遇恭惟皇帝陛下內明俊德外好善言尊天則厯象日月星辰祗已則左右準繩規矩睿文有煥淵智不矜樂感民和遠軼文章之作疆開徼外更踰下土之敷格在帝心震于神物塚以雲油而雨霈形其天銳而地方舉肆覲之上儀會同嘉叙御非常之大寶啟迪純禧欣陪來賀之班但祝歷年之永

又謝賜玄圭集議冊表

臣某言天瑞告成皇模稽古庶言載繹大典肆頒中謝竊以妙通神明則有非常之應盛超今昔則有無窮之傳蓋天弗違惟道乃久恭惟皇帝陛下堯德廣運禹功平成曠然翔見之祥申以疇咨之議昭受上帝屢播詔音鋪張闋休是存鉅冊臣幸叨寵錫竊快榮觀願偕敷

金定四庫全書 卷四
土之書永作藏家之訓

賀上元開封獄空及路不拾遺表

臣某等言國家閒暇盛元夕之豫遊園囿空虛屬神都之喜靖俗更敦於廉慈義不取於墮遺書信牘以有光播綿區而交慶中賀竊以周德厚成王之世方底措刑魯邦聞孔子之風遂無拾路惟輦轂浩穰之舊宜歲時抵冒之繁今乃民協于中罔干予正至若貨棄於地不必已截蓋摩義漸仁親覩聖人之作故遷善遠罪首同大道之行恭惟皇帝陛下德與氣游政從綱舉有孚翼翼之邑於變熙熙之臺月當春王正之中殆無居者人篤士君子之行靡犯有司獄無兩造具備之辭市有三日後舉之物賞亟行於象魏威盡弛於桁楊臣竊幸丁辰共深歸美有耻且格莫窮鼓舞之神無疆惟休但罄形容之頌

賀大理寺去年並無斷過大辟表

臣某等言民變時雍初鮮有司之犯吏登歲會訖無重

辟之書凡在燾臨共勤呼舞中賀竊以堯舜之隆尚矣
但晝衣冠成康之治休哉獨空圖圖逮及馭威之密格
茲去殺之稀服念五六至旬時之言莫知脊訓所斷二
十有九人之事已聳前聞惟盛旦之孚休俾嘉師之遠
罪自觀象於正月之吉迄飭典待來歲之宜歷稽廷尉
要囚之文靡有士師泣戮之命恭惟皇帝陛下道樞貸
物慈寶鎮邦正本清源律設恢恢之網漸仁摩義風移
皞皞之民宜有極功臻於平國天府授中而計獄止列
寬科史官記事以繫年肇新凡例臣等幸叨修輔咸仰
好生維春之祺固大開於壽域播刑之典將益廣於德
心臣等無任

賀三山天成聖功橋成表

臣某等言經瀆趨山百神受職浮梁枕石萬世賴功息
解繫之歲勞扼高深之天險號名中出謳頌共傳中賀
竊以導河大伾茲惟禹迹造舟渭涘有若文謀於皇先
帝之遠圖首發永橋之宏議天開地闢實待聖時山盈

川冲自全坤勢奮不疑之獨斷迴欲倒之狂瀾三峯屹
於屯雲四崖堅於削鐵雙流既東千艦可縻巨柱相通
跨東西之秋漢中阿特起貫南北之晴虹邦其孚休民
不病涉恭惟皇帝陛下昊天其子上帝是依環神鼎以
定八方寶玄圭而宅四隩陋鄭人之輿濟因周民之子
來靡牽脊動之言用訖丕承之烈興國家長久之利不
日而成壯道德安疆之威自今以始臣莫裨允俞竊預
榮德聽行路之驩呼想殊鄰之震愕徧裒海嶽願揚不
世之光咸造軒墀敢上無疆之壽臣等無任

